

# МЪЗГИНИЙА ЛЬ ГОРА МАРҚОС

## Пешготын

«Мъзгинийа<sup>Ф</sup> Иса<sup>Ф</sup> Мәсінә<sup>Ф</sup> ль гора Марқос» жь нава һәр чар Мъзгинийада йа һәрә кьн э у бәри һәр се Мъзгинийа жи һатийә һьвисаре. Бь фькьра гәләк занә әв бәри сала һ'әфтейи (70-и пәй буйина Иса) һатийә һьвисаре, гава Оршәлим<sup>Ф</sup> һеран бу.

Ль гора шә'дәтийа шьвина<sup>Ф</sup> сәдсалия дөдада, Марқос хвәха әв Йуһ'әнна-Марқос ә, дәрһәқа к'ижанида к'ьтеба К'аре Шанди-йада (12:12, 25; 13:4-5; 15:37-39) у өса жи чәнд нә'мед шандийада<sup>Ф</sup> бә'са ви дькьн (Колоси 4:10; Фьлимон 24; Тимот'ейо II, 4:11). Әви гәләки р'ешити т'әви Павлос у Барнабас<sup>Ф</sup> кьрийә, өса жи йәки гәләки незики Пәтрусе<sup>Ф</sup> Шанди бу (Пәтрус I, 5:13).

К'ьтеб серида дьбежә кө фькьра һе дәрһәқа Мъзгинийа Иса Мәсінда йә (1:1). һатьна Иса Мәсін да к'ьфше, кө әв вәхте Хвәде к'ьфш кьрьбу пер'а гьһиштийә, вәки хьлазбуне<sup>Ф</sup> бьдә мәрвьайе<sup>Ф</sup> (1:15). Марқос Иса тинә бәр ч'ә'ва, кө Әв йәки хвәйиһ'өкөм э у һ'өкөме Ви нава һинкьрьне, шьндәрхьстьне, өса жи гөнәбах-шандьнеда к'ьфш ә. һьнге Иса һеди-һеди Хвә шагьртед<sup>Ф</sup> хвәва дьдә наскьрьне кө Әв Мәсін ә, ава готи К'ьфшкьрийе Хвәде йә. Ле Иса чьқаси Хвә шагьртед хвәва дьдә наскьрьне, һақаси ль сәр мьрьн у р'абуна Хвә хәбәр дьдә, йа кө һе Оршәлимеда бьқәшьмийа. Иса Хвәр'а дьбежә «Көр'е<sup>Ф</sup> Мәрвь», йе кө һатә дьн-йайе, вәки ә'мьре Хвә бьдә кө мәрвь жь қөйдед гөнә<sup>Ф</sup> хьлаз бьн.

Мъзгинийа Марқос һе гәләки сәр кьред Иса дьсәкьнә, нә кө сәр һинкьрьна Ви. Бона Йуһ'әннайе<sup>Ф</sup> ньхөмдар<sup>Ф</sup>, өса жи ньхөман-дьн<sup>Ф</sup> у шер'ьбандьна<sup>Ф</sup> Иса кьн һатийә һьвисаре. Паше шарәкер'а дәрбази сәр шьхөле Вийи нәхвәшқәншкьрьне у һинкьрьна Ви дьбә. Чьқас дьчу шагьртед Ви һе Әв нас дькьрьн, дьжмьнед Ви

жи һе к'ин Вир'а дажотын. Сәред хьлазийеда (11-а һ'эта 16-а) бона һ'әфтийа Исайә хьлазийе нъвисар ә, дәрһәқа хачбун<sup>ф</sup> у р'абуна Вийә жь мьрьне.

Әва Мьзгинийа гәләки шә'дәтийа кьред Иса дьдә у тьһәрәки зәлал у көрт һатийә нъвисаре, әва Иса бәрч'ә'в тинә у дьдә к'ьфше, вәки һәр хвәндәванәк мина сәрсәд<sup>ф</sup> бькарьбә бькә гази бежә: «Р'аст әв мәрвь Көр'е<sup>ф</sup> Хвәде йә» (15:39).

Әва Мьзгинийа гәләки ль сәр шәфак'ьшандьна Иса дьсәкьнә, өса жи сәр шәфайед ван, йед кө we ль пәй Ви һәр'ьн. Ль гора фькьра мәсһийед<sup>ф</sup> бәре, МарҶос әва Мьзгинийа бажаре Р'омеда<sup>ф</sup> нъвисийә. Жь ве йәке те к'ьфше, кө МарҶос әв йәк һе бона бавәрмәндед Р'омайеда нъвисийә, чьмки бавәрмәндед ви чахи гәләк шәфа жь дәсте Нероне Қәйсәре<sup>ф</sup> Императорийа Р'омайе дьдитын, (һ'өкөмәта ви жь сала 54-а һ'эта 68-а бу).

### Сәрәщәма фькьра к'ьтебе

Дәстпебуна Мьзгинийе (1:1-13)

Даннасини у шьхөлед Исайә Щәлиледа<sup>ф</sup> (1:14–9:50)

Р'ийа Исайә жь Щәлиле һ'эта Оршәлиме (10:1-52)

Һ'әфтийа Исайә хьлазийе ль Оршәлиме у дор-бәред веда  
(11:1–15:47)

Р'абуна Иса жь мьрьне (16:1-8)

Пәй р'абунер'а хөйабун у жорһьлатьна Иса (16:9-20)

### Даннасинийа Йуһ'әннайе<sup>ф</sup> ньхөмдар<sup>ф</sup>

(Мәтта 3:1-12; Лука 3:1-18;

Йуһ'әнна 1:19-28)

**1** <sup>1</sup> Мьзгинийа<sup>ф</sup> Иса<sup>ф</sup> Мәсһе<sup>ф</sup> Көр'е<sup>ф</sup> Хвәде бь ви тьһәри дәстпебу: <sup>2</sup> Чава кө к'ьтеба

Ишайа<sup>ф</sup> П'ехәмбәрда<sup>ф</sup> һатийә нъвисаре:

«Ва йә Әзе қасьде Хвә пешия Тәва бышиньм.

Әwe бона Тә р'е һазьр кә»\*.

**3** «Дәнгәк бәр'ийеда<sup>ф</sup> дькә гази:

«Р'ийа Хөдан<sup>ф</sup> һазьр бькьн

\* 1:2 Малахи 3:1.

у шьвэр'ийед<sup>ф</sup> Wi р'аст бь-  
кьн<sup>\*»</sup>.

4 Awa Йуһ'әнна<sup>ф</sup> бэр'ийеда  
хөйа бу, шьмэ'т дьньхөманд  
у даннасин дькър, кö жь гө-  
нэкърне вөгэр'ьн<sup>ф</sup> у бенө  
ньхөмандьне<sup>ф</sup>, вэки гөнед  
ван бенө бахшандьне. 5 Жь  
h'эму вэлате Щьһустане<sup>ф</sup> у  
т'эмамия шьмэ'та Оршә-  
лиме<sup>ф</sup> дьһатә щәм ви, гөнед  
хвә дьданә р'уйе хвә у ч'эме  
Урдөнеда бь дәсте ви дьньхө-  
мин. 6 Йуһ'әнна к'ьншәкә жь  
пър'ч'а дөве ль хвә кърбу у  
ль пышта хвә жи қайишәкә  
ч'эрм гьредабу. Хварьна ви  
көли<sup>ф</sup> у һьнгьве чоле бу. 7 Әви  
даннасин дькър удьгот: «Йәки  
жь мьн қәваттър we бе. Әз нә  
һежа мө, кö та бьм у бөне ча-  
рьхе Wi жи вәкьм. 8 Мьн һун  
бь аве ньхөмандьн, ле Әwe вө  
бь P'öh'e<sup>ф</sup> Пироз бьньхөминә».

**Иса те ньхөмандьн  
у шер'ьбандьне<sup>ф</sup>**  
(Мәтта 3:13–4:11;  
Луқа 3:21-22; 4:1-13)

9 У ван р'ожада Иса жь ба-  
жаре Ньсрәта Щәлиле<sup>ф</sup> һат у  
бь дәсте Йуһ'әнна ч'эме Урдө-

неда һатә ньхөмандьне. 10 Һәма  
чава Иса жь аве дәрк'әт, дит  
кө әзман вәбун у P'öh' мина  
кәвоткәке ль сәр Wi дани.  
11 У дәнгәк жь әзмана һат у  
гот: «Tө Көр'е Мьни дәләл и  
Әз жь Тә р'әзи мә».

12 We гаве P'öh' бәре Иса  
да бэр'ийе. 13 Әw чьл р'ожиф  
ль бэр'ийе ма у жь мирешьн<sup>ф</sup>  
һатә шер'ьбандьне<sup>ф</sup>. Әw т'әви  
р'ә'вьра бу у мьляк'әта<sup>ф</sup> жер'а  
бәрдәсти кърн.

**Иса қөза Щәлиледа  
дәст бь к'әре Хвә дькә**  
(Мәтта 4:12-17; Луқа 4:14-15)

14 Пәй гьртьна Йуһ'әннар'а  
Иса чу қөза Щәлиле у дәст  
бь даннасинийа Мьзгинийа  
Хвәде кър 15 у дьгот: «Wәхт  
пер'а гьһиштйә, П'адшатийа<sup>ф</sup>  
Хвәде незик буйә, жь гөнәкър-  
рьне вөгэр'ьн у бавәрийа<sup>ф</sup> хвә  
Мьзгинийе биньн!»

**Иса гази һәр чар  
мә'сигьра дькә**  
(Мәтта 4:18-22; Луқа 5:1-11)

16 Гава Иса ль дөве гола Щә-  
лиле дьгәр'ийа, р'әсти Шьм-  
һ'ун<sup>ф</sup> у Әндравьсе бьре ви

\* 1:3 Ишайа 40:3.

нат. Вана т'ор' давитә голе, чьмки мә'сигьр бун. <sup>17</sup> Иса готә ван: «Пәй Мьн вәрьн, Эзе вә бькмә неч'ирванед мәрва<sup>ф</sup>». <sup>18</sup> Вана жи һәма we дәме т'ор'ед хwә һыштын у пәй Wi чун. <sup>19</sup> Дәма кә Иса жь wi шийи һнәки пешда чу, р'асти кәр'ед Зәбәди, Ақуб<sup>ф</sup> у Йуһ'әннайе<sup>ф</sup> бьре wi нат. Вана қәйькеда т'ор'ед хwә һивез дькьрын. <sup>20</sup> Ынге Иса гази ван кьр, вана жи баве хwә Зәбәди т'әви п'ала қәйькеда һышт у пәй Wi чун.

**Иса р'өһ'е<sup>ф</sup> һ'әрам<sup>ф</sup> дәрдьхә**

*(Луқа 4:31-37)*

<sup>21</sup> Эw гьһиштынә Кәфәрна-һуме. Иса we р'ожа<sup>ф</sup> шәмийе р'аст к'әтә к'ьниште у дәст бь һинкьрьне кьр. <sup>22</sup> Эвана ль сәр һинкьрьна Wi зәндәгьрти<sup>ф</sup> мабун, чьмки Эwi мина йәки хwәйиһ'өкөм әw һин дькьрын, нә кә мина қанунзана<sup>ф</sup>. <sup>23</sup> Ынге к'ьништа<sup>ф</sup> ванда мәрвәк һәбу, кә р'өһ'е<sup>ф</sup> һ'әрамва гьрти бу. Wi кьрә қир'ин у гот: <sup>24</sup> «Тө чь жь мә дьхwази, йа Исайе Ньсрәте? Тө һатийи қьр'а мә бини? Эз заньм Тө к'и йи. Тө Пирозе Хwәде йи!» <sup>25</sup> Иса ле һьлат<sup>ф</sup> у гот: «Кәр' бә

у же дәрк'әвә!» <sup>26</sup> Ынге р'өһ'е һ'әрам әw вәч'ьр'ьканд у бь дәнгәки бьльнд кьрә қир'ин у же дәрк'әт. <sup>27</sup> Һ'әму зәндәгьрти ман, һәвр'а к'әтынә пьрс-пьрс-сийара у дьготын: «Әв чь йәк ә? Чь һинкьрьнәкә ну йә! Бь һ'өкөм Эw ә'мьри ль р'өһ'ед һ'әрам дькә у әw жи ельми<sup>ф</sup> Wi дьбьн». <sup>28</sup> У нав у дәнге Иса пер'а-пер'а һ'әму дор-бәрәд Щәлиле бәла бу.

**Иса гәләк нәхwәша**

**қәнщ дькә**

*(Мәтта 8:14-17; Луқа 4:38-41)*

<sup>29</sup> Гава кә Иса жь к'ьниште дәрк'әт, т'әви Ақуб у Йуһ'ән-на р'аст чунә мала Шьмһ'ун у Әндрауьс. <sup>30</sup> Хwәсийа Шьмһ'ун т'айеда п'алдайи бу. Ынге бона we Исар'а готын. <sup>31</sup> Иса жи чу незик, дәсте we гьрт р'акьр у т'айе же бәр'да, р'абу бәрдәсти ванр'а кьр. <sup>32</sup> Еваре, гава р'о чу ава, һ'әму нәхwәш у йед шьнак'әти<sup>ф</sup> анинә шәм Wi. <sup>33</sup> Т'әмамайа шьмә'та бажер ль бәр дери шьвийа. <sup>34</sup> Иса гәләк мәрвәд бь нәхwәшийед шур'ә-шур'ә қәнщ кьрын. Гәләк шьн<sup>ф</sup> жи дәрхьштын у нәдһьшт кә шьн хәбәр дьн, чьмки шьна заньбу кә Эw К'и йә.

**Иса Мъзгинийа Хвәде  
пақъза Щәлиледи бәла дькә**

<sup>35</sup> Қарәбәрбанга сьбәһе р'абу, дәрк'әт чу щики хәвлә у ьър дөа кьр. <sup>36</sup> Шьмһ'ун у йед т'әви Ви ль Иса гәр'ийан <sup>37</sup> у гава кә ван Әв дит, готьне: «Һ'әму ль Тә дьгәр'ьн». <sup>38</sup> Иса ванр'а гот: «Әм һәр'ьнә гөнд-бажаред незик, вәки Әз ль ван дәра жи даннасин кьм, чьмки Әз бона ве йәке һатьмә». <sup>39</sup> У ль т'әмамия Щәлиле дьгәр'ийа, к'ьништед ванда даннасин дькьр у щьн дәрдьхьстьн.

**Иса йәки жь к'отибуне<sup>Ф</sup>  
пақъж дькә**

*(Мәтта 8:1-4; Луға 5:12-16)*

<sup>40</sup> У йәки к'оти<sup>Ф</sup> һат, ль бәр Иса чокда, р'әща же кьр у готе: «Һәгәр Тө бьхвази, дькари мьн пақъж ки». <sup>41</sup> Гөне Иса пе һат, дәсте Хвә дьреж кьр ле к'әт у готе: «Әз дьхвазьм. Пақъж бә!» <sup>42</sup> У пәй ве готьнер'а дәстхвәда к'отибун же чу у әв пақъж бу. <sup>43</sup> Иса пер'а-пер'а әв дәрхьстә дәр, һ'ышк т'әми ль ви кьр <sup>44</sup> у wir'а гот: «Бьньһер'ә т'ө кәси-р'а тыштәки нәбежи, ле һәр'ә хвә нишани к'аһин<sup>Ф</sup> кә у чава кә Муса<sup>Ф</sup> т'әми дайә, һ'әдийа<sup>Ф</sup>

хвә бьдә, вәки һ'әмуяр'а бьбә шә'дәти, кә тө пақъж буйи». <sup>45</sup> Ле әв мәрвь дәрк'әт дәстпекьр ашкәрә гот у әва йәка бәла кьр, өса кә Иса иди нькарьбу ашкәрә бьчуйа бажарәки, ле жь бажер дәр ль щийед хәвлә дьма. У щьмә'т жь һәр алийава дьһатьнә щәм Ви.

**Иса шьлушә'тәки қәнщ дькә  
у гөнед ви дьбахшинә**

*(Мәтта 9:1-8; Луға 5:17-26)*

**2** <sup>1</sup> Пәй чәнд р'ожар'а Иса вәгәр'ийа Кәфәрнаһуме. Ынге һатә бьһистьне, кә Әв малда йә. <sup>2</sup> Маледи һақас мәрвь шьвийан, һ'әта кә ль бәр дери жи ши-сьт'ар т'өнәбу. Иса хәбәра мьзгинийе әв һин дькьрьн. <sup>3</sup> У мәрвь һатьн, жь нав ванда чар мәрва шьлушә'тәк һьлдабун данинә щәм Иса. <sup>4</sup> Ле жь дәст ә'лаләте р'е нәдитьн кә незики Иса буна, вана бане ханийе кә Иса теда бу қәл кьр у мәрве шьлушә'т бәр'ева дахьстьнә жере. <sup>5</sup> Гава кә Иса бавәрийа ван дит, готә йе шьлушә'т: «Лаво, гөнед тә һатьнә бахшандьне». <sup>6</sup> Жь қанунзана һьнәк ььра р'уныштьбун у дьле хвәда дьготьн: <sup>7</sup> «Әви һан чьма өса хәбәр дьдә?

Эва нъге хвэ Хвэдер'а давежэ!  
Пештьри Хвэде к'идькарэ гона  
быбахшинэ?»

<sup>8</sup>Дэстхвэда р'оһ'е Исава э'йан  
бу кӧ эвана аһа дьфькьрын, Эви  
гот: «Һун чьма тыштед аһа дь-  
ле хвэда дьфькьрын?» <sup>9</sup>К'ижан  
р'ьһ'эт э, шьлушэ'тр'а бежн:  
«Гӧнед тэ һатьнэ бахшандьне?»  
йан бежне: «Р'абэ бэр'а хвэ  
һьлдэ у быгэр'э?» <sup>10</sup>Ле вэки һун  
бызаньбын кӧ һ'ӧкӧме Кӧр'е<sup>ф</sup>  
Мерьв һэйэ ль сэр э'рде гона  
быбахшинэ...» <sup>11</sup>готэ йе шьлу-  
шэ'т: «Эз тэр'а дьбежым, р'абэ  
бэр'а хвэ һьлдэ, һэр'э мала  
хвэ». <sup>12</sup>Эв жи пер'а-пер'а ль  
бэр ч'э'ве һэр кэси р'абу, бэр'а  
хвэ һьлда, дэрк'эт у чу. Һ'эму  
жи һ'эйири ман, шькьри данэ  
Хвэде у готын: «Мэ тыштэки  
ӧса т'ӧ шар нэдитийэ!»

### Иса гази Левий<sup>ф</sup> дькэ

(Матта 9:9-13; Лука 5:27-32)

<sup>13</sup>Иса диса чу дэве голе. Т'э-  
маийа э'лалэт дьһатэ шэм Ви  
у Эви жи эв һин дькьрын. <sup>14</sup>Ча-  
хе Иса р'еда чу, Левийе<sup>ф</sup> кӧр'е  
Һалфаво ль шийе хэрщһьлдане  
р'уньшти дит у готе: «Пэй Мьн  
вэрэ». Эв жи р'абу пэй Иса  
чу. <sup>15</sup>Гава Иса мала Левида  
сэр сьфре бу, гэлэк хэрщгьр<sup>ф</sup> у

гӧнэк'ар<sup>ф</sup> т'эви Ви у шагьртед<sup>ф</sup>  
Ви ль сэр сьфре р'уньштъ-  
бун, чьмки йед пэй Ви дьчун  
гэлэк бун. <sup>16</sup>Гава қанунзанед  
жъ нава ферьсийа<sup>ф</sup> дитын кӧ  
Иса т'эви хэрщгьр у гӧнэк'ара  
ль сэр сьфре р'уньшти йэ, жь  
шагьртед Ви пьрсин: «Чьма  
Эв т'эви хэрщгьр у гӧнэк'ара  
дьхвэ у вэдьхвэ?» <sup>17</sup>Чахе Иса  
быһист, ванр'а гот: «Сахлэм нэ  
һ'эвще һ'эким ын, ле нэхвэш.  
Эз нэ һатьмэ гази йед р'аст кьм,  
ле гази гӧнэк'ара».

### Пьрса р'ожигьртъне

(Матта 9:14-17; Лука 5:33-39)

<sup>18</sup>Шарэке шагьртед Йуһ'ән-  
на у ферьсийа р'ожи дьгьртън.  
Чэнд мэрв һатьнэ щэм Иса у  
же пьрсин: «Чьма шагьртед Йу-  
һ'әнна у йед ферьсийа р'ожийа  
дьгьрын, ле шагьртед Тэ р'ожи  
нагьрын?» <sup>19</sup>Иса готэ ван: «Һ'э-  
та зэ'ва т'эви ван э, гэло дьбэ  
кӧ хвэндийед дэ'вате р'ожи  
быгьрын? Һ'эта зэ'ва т'эви ван  
э, эв нькарын р'ожи быгьрын!  
<sup>20</sup>Ле р'ож we бен, гава зэ'ва жь  
ван бе һьлдане, һынге we р'оже  
we р'ожи быгьрын. <sup>21</sup>Т'ӧ кэс пе  
п'арч'е ну к'ьнща кэвьн п'инэ  
накэ. Һэгэр ӧса быкэ, п'арч'е  
к'ьнща кэвьнва дьрути we зоре

ль к'ьнща кэвьн бькэ у шийе қэльши we he ль бэр һэвва һэр'э.

<sup>22</sup> У нэ жи кэсэк шэрава ну дькэ мәшкед кэвьн. Һэгэр օса бькэ, шэрава ну we мәшка бь-т'эқинэ, һьн шэраве օнда бэ, һьн жи мәшк. Ле шэрава ну дькьнэ мәшкед ну».

### **Пьрса р'ожа шәмийе**

(*Матта 12:1-8; Лука 6:1-5*)

<sup>23</sup> Иса р'ожкэ шәмийе нава зэвийар'а дэрбаз дьбу у шагьртед Wi р'ева дэстпекьрн сьм-бьлед геньм чьнин. <sup>24</sup>Ферьсийа Исар'а гот: «Бьньһер'э! Чьма шагьртед Тэ тьште нэщайизи р'ожа шәмийе дькьн?» <sup>25</sup> Иса ль ван вэгэр'анд у гот: «Wө қэт нэхвэндийэ кօ Дауьд<sup>ф</sup> жь һ'эвшэтийе чь кьр, гава эw у йед пер'а бьр'чи бун? <sup>26</sup> Эw wэхте Эвйатаре сэрэкк'аһин-да к'этэ Хана<sup>ф</sup> Хwөде у нане<sup>ф</sup> Хwөдер'а дайи хвар, кօ эw нан пештьри к'аһина нэ щайиз бу йэки дьн бьхвара. Сэрда жи эw нан да йед т'эви хwө»\*. <sup>27</sup> Паше сэр готьна Хwөда зедө кьр готэ ван: «Р'ожа шәмийе бона инсен һатэ данине, нэ кօ инсан бона р'ожа шәмийе!

<sup>28</sup> Аwa готи Кօр'е Мерьв Хөдане р'ожа шәмийе йэ жи».

### **Иса р'ожа шәмийе мәрье кօ дэсте ви к'ьшийабу қәнщ дькэ**

(*Матта 12:9-14; Лука 6:6-11*)

**З** <sup>1</sup> У Иса диса к'этэ к'ьниште. Ль we дэре мәрвьэк һэбу, кօ дэсте ви к'ьшийабу. <sup>2</sup> У ч'э'ве һьнэка сэр Wi бу, гәло р'ожа шәмийе Эwe ви қәнщ кә йан на, wәки хәйба Wi бькьн. <sup>3</sup> Иса мәрье дэстк'ьшийайир'а гот: «Р'абэ ве говәке бьсәкь-нә!» <sup>4</sup> Паше ванр'а гот: «Р'ожа шәмийе қәнщикьрн щайиз э, йан хьрабикьрн? Р'өһ'эки хьлаз<sup>ф</sup> кьн, йан օнда кьн?» Ле ван дәнг нәкьр. <sup>5</sup> Иса бь һерс ль дора Хwө ньһер'и, бона сэр-һ'ьшкия ван бэр Хwө к'эт у ви мәрвьир'а гот: «Дэсте хwө дьреж кә». Эви жи дьреж кьр у дэсте ви диса қәнщ бу. <sup>6</sup> Ферьси дәрк'этьнэ дэрва у пер'а-пер'а т'эви һеродәсийа<sup>ф</sup> шешьрин, кօ чава Wi бьдьнэ кօштьне.

### **Щьвата ль дэве голө**

<sup>7</sup> Иса т'эви шагьртед Хwө чүдө-ве голө. Жь Щәлиле э'лаләтәкә

\* <sup>2:26</sup> Қануна К'аһинтийе 24:9; П'адшати I, 21:1-6.

гъран пэй Ви чу. <sup>8</sup> Гава кō ва-на кърънед Ви б̄хистън, жь Щ̄һустане, Оршәлиме, Иду-мәйайе, ви алийе Урдōнейи р'оһьлате, оса жи жь қәза Сур у Сайде гәләк мәрвь һатънә щәм Ви. <sup>9</sup> У Иса жь дәст ә'лаләте шагъртед Хвәр'а гот, кō Ви-р'а қәйбкәке һазър кьн, вәки нәк'әвә ль бәр дә'фа. <sup>10</sup> Чьмки Иса гәләк мәрвь қәнщ кърън, оса кō йед нәхвәш т'опи сәр дьбун, вәки дәсте хвә бьдана Ви. <sup>11</sup> Дәма кō р'оһ'ед һ'әрам Әв дьдитън, ль бәр Ви дөвәр'уя хвә давитьнә ә'рде, дькърънә қир'ин у дьготън: «Тō Көр'е Хвәде йи!» <sup>12</sup> Ле Иса һ'ышк т'әми ль ван дькър, кō бона Ви нәкьнә дәнги.

### **Бьжартъна һәр донздәһа**

*(Мәтта 10:1-4; Луқа 6:12-16)*

<sup>13</sup> Иса һьлк'ышия ч'ийе у мәрвьед кō Ви дьхвәстън гази щәм Хвә кърън. Әв жи чунә щәм Ви. <sup>14</sup> Әви донздәһ мәрвь бьжартън, навед ван «шанди<sup>ф</sup>» дани, кō т'әви Ви бьминън у ван бьшинә, вәки даннасин кьн. <sup>15</sup> У һ'өкөм да ван кō щьна дәрхьн. <sup>16</sup> Һәр донздәһед бьжарти әв ын: Шьмһ'ун (кō наве ви кърә Пәтрус<sup>ф</sup>), <sup>17</sup> Ақубе<sup>ф</sup>

Зәбәди у Йуһ'әннайе бьре ви, (әви наве Боанәрщәс ль ван кър, кō те фә'мкъръне: «Көр'ед Гөр'инийа Ә'змен») <sup>18</sup> Әндра-вьс, Филипо, Бәртоломәйо, Мәтта, Т'ума, Ақубе<sup>ф</sup> көр'е Һалфаво, Тәдайо, Шьмһ'уне вәлатп'арьст<sup>ф</sup> <sup>19</sup> у Щ̄һудайе<sup>ф</sup> Исхәрийоти йе кō бу нәмаме Иса.

### **Иса у Бәлзәбул<sup>ф</sup>**

*(Мәтта 12:22-32;*

*Луқа 11:14-23; 12:10)*

<sup>20</sup> Паше Иса чу маләке. Диса һақас ә'лаләт щьвийа, һ'әта кō нькарьбун нане хвә жи бь-хварана. <sup>21</sup> Гава йед жь хун у қьнета Ви б̄хистън, дәрк'әтън Ви бьгърън, чьмки вана дьгот: «Әви һ'ыше Хвә онда кьрийә!» <sup>22</sup> У әв қанунзанед кō жь Ор-шәлиме бәржер бьбун, дьготън: «Бәлзәбул<sup>ф</sup> Вида һәйә! Әв бь һ'өкөме сәрвере щьна щьна дәрдьхә!» <sup>23</sup> Иса жи әв гази щәм Хвә кърън у бь мәсәла ванр'а гот: «Мирешън чава дькарә хвәха хвә дәрхә? <sup>24</sup> Һә-гәр нав п'адшатикедә т'ьфақ<sup>ф</sup> т'өнәбә, әв нькарә бьминә. <sup>25</sup> Мала кō бет'ьфақи бьк'әве, әв мал нькарә бьминә. <sup>26</sup> Һәгәр мирешън р'абә һьмбәри хвә у бьбә дөтирәти, әв нькарә



бьминэ, ле бэле we хьлазияа ви бе. <sup>27</sup> Ле бэле т'ө кэс нькарэ бьк'эвэ мала мерхасэки у һэбука<sup>ф</sup> ви т'алан кэ, һэгэр пешийе ви мерхаси гьренэдэ. Гава гьреда, һынге we бькарьбэ мала ви т'алан кэ.

<sup>28</sup> Эз р'аст вэр'а дьбежым, һэр гөнэ у һэр готьна хьраб кё бежын we ль бэндед дьне бенэ бахшандьне, <sup>29</sup> ле к'и кё готьнэкэ хьраб мьқабыли Р'ө-һ'е Пироз бежэ, т'ө шар ль ви найе бахшандьне. Эwe бь ви гөнэйи һ'эта-һ'этайе сушдар бэ». <sup>30</sup> Иса эв йэк гот, чьмки ван дьгот: «Р'өһ'е һ'эрам Ви-да һэйэ».

### Де у бьрайед Иса

(Матта 12:46-50;

Лука 8:19-21)

<sup>31</sup> Ынге де у бьрайед Иса һатьн, ль дэрва сэкьнин, йэк шандьнэ пэй Ви у гази Ви кьрын. <sup>32</sup> Э'лалэта кё ль дора Ви р'уньштьбу готэ Ви: «Ва дийа Тэ у бьрайед Тэ дэрва пьрса Тэ дькын». <sup>33</sup> Иса шаба ван да у гот: «Дийа Мьн у бьрайед Мьн к'и нэ?» <sup>34</sup> Ынге ль йед дора Хвэ р'уньшти ньһер'и у гот: «Ва нэ де у бьрайед Мьн! <sup>35</sup> Һэр кэсе кё хвэстьна Хвэде

бинэ сери<sup>ф</sup>, эw э бьре Мьн, хушка Мьн у дийа Мьн».

### Мэсэла т'охьмр'эш<sup>ф</sup>

(Матта 13:1-9; Лука 8:4-8)

**4** <sup>1</sup> Иса диса ль дэве голе дэст бь һинкьрыне кьр. Э'лалэтэкэ өса мэзын ль дора Ви шьвийа, к'эрба Эw к'этэ қэйька ль сэр голе у р'уньшт. Т'эмаийа э'лалэте ль дэве голе бу <sup>2</sup> у Ви бь мэсэла эw һини гэлэк тышта дькьрын. Ынкьрына Хвэда гот: <sup>3</sup> «Гөһ-дари! Т'охьмр'эш<sup>ф</sup> р'абу чу кё т'охьм бьр'эшинэ. <sup>4</sup> Чахе эwi т'охьме хвэ дьр'эшанд, һнэк же к'этьнэ дэве р'е, тэйрэдэ һатьн у эw хварьн. <sup>5</sup> У һнэк к'этьнэ сэр э'рде кэвьри, ль вьр кё хвэли кем бу. Эw зу шин бун, чьмки тэлаше хвэлийе нэ к'ур бу. <sup>6</sup> Чахе тэ'в дэрк'эт, эw ч'ьлмьсин у чьмки р'авед<sup>ф</sup> ван т'өнэбун, һ'ышк бун. <sup>7</sup> У һнэкед дьн к'этьнэ нава стьрийа, стьри р'абун эw хэньқандьн у бэр нэдан. <sup>8</sup> У һнэкед дьн жи к'этьнэ нава э'рде қэнщ у шин бун, мэзын бун у һнэка си, һнэка шест, һнэка сэд шар бэр дан».

<sup>9</sup> У Иса ванр'а гот: «Гөһе к'ейи бьһистьне һэйэ бьра бьбьһе».

**Иса чьма бь мѣсѣла  
хѣбѣр дьдѣ**

*(Мѣтта 13:10-17; Луҥа 8:9-10)*

<sup>10</sup> Гава Иса т'ѣне ма, йед дора Ви гьртьбун т'ѣви хѣр донздѣна, бона ван мѣсѣла же пьрсин. <sup>11</sup> Эви шаба ван да у гот: «Wѣр'а натийѣ дайине кѣ хун сѣр'ед П'адшатийа Хвѣде бьзаньбьн, ле бона ван, йед кѣ дѣрва нѣ, хѣр тышт бь мѣсѣла те готьне, <sup>12</sup> wѣки:

«Чьдаси бьньхѣр'ьн жи, нѣ-биньн,  
чьдаси бьбьхѣн жи, фѣ'м нѣкьн,  
wѣки нѣбѣ кѣ вѣгѣр'ьн<sup>ф</sup> у ль ван бе афукурьне<sup>ф\*</sup>».

**Шьровѣкьрьна  
мѣсѣла т'охьмр'ѣш**

*(Мѣтта 13:18-23;*

*Луҥа 8:11-15)*

<sup>13</sup> Ёнгѣ Иса ванр'а гот: «Ёун ве мѣсѣле фѣ'м накьн? Ле иди хуне х'ѣму мѣсѣла чава фѣ'м бькьн? <sup>14</sup> Т'охьмр'ѣш хѣбѣре дьр'ѣшинѣ. <sup>15</sup> Эвед ль дѣве р'ѣ кѣ хѣбѣр ле те чандьне, ѣв Ён, кѣ гава дьбьхѣн, пер'а-пер'а мирѣщьн те у хѣбѣра дьле<sup>ф</sup>

ванда чанди дѣрдьхѣ. <sup>16</sup> Эвед ль сѣр ѣрде кѣвьри ѣв Ён, кѣ гава хѣбѣре дьбьхѣн, ѣв зу бь ѣшд у ша we қѣбул дькьн, <sup>17</sup> ле чьмки р'ѣвед ван т'ѣнѣнѣ, ѣв дьреж т'ѣв накьн. У гава бона хѣбѣре р'ѣсти тѣнгасийа<sup>ф</sup> йан зерандьне тен, зу жь р'ѣ дьк'ѣвьн. <sup>18</sup> У ѣвед нава стьрийада хатьнѣ чандьне ѣв Ён, кѣ хѣбѣре дьбьхѣн, <sup>19</sup> хѣмед ве дьнйае, дѣрѣвед дѣвлѣтийе у хвѣстьна тыштед дьн дьк'ѣвьнѣ наве у хѣбѣре дьхѣньнѣн, ѣв бе бѣр дьминьн. <sup>20</sup> У ѣвед ѣрде қѣнщда хатьнѣ чандьне ѣв Ён, кѣ хѣбѣре дьбьхѣн, қѣбул дькьн, хьнѣк си, хьнѣк шѣст у хьнѣк жи сѣд шар бѣр дьдьн».

**Ч'ьра сѣр п'ѣч'ьре<sup>ф</sup>**

*(Луҥа 8:16-18)*

<sup>21</sup> У Иса ванр'а гот: «Гава ч'ьре тиньнѣ хьндѣр', бона чь тиньн? Бона бьн сѣльке, йан бона бьн ньвине? Нѣ тиньн кѣ дайньнѣ сѣр п'ѣч'ьре<sup>ф</sup>? <sup>22</sup> Т'ѣ тыште вѣшарти т'ѣнѣйѣ кѣ нѣйе ашкѣрѣкьрьне у нѣ жи тыштѣки дьзива хѣйѣ кѣ нѣк'ѣвѣ бѣр р'ѣнае. <sup>23</sup> Гѣхе к'ѣйи бьхистьне хѣйѣ бьра бьбьхе».

\* 4:12 Ишайа 6:9-10.

<sup>24</sup> Иса ванр'а гот: «Дина хвэ бьднэ тыштед кӧ һун дьбьһен. Һун бь чь чапе бьпивьһн, бь we пиване жи we wэр'а бе пиване у сэрда жи we he зедэ бэ. <sup>25</sup> Чьмки к'ер'а кӧ һэйэ, we he ле зедэ бэ у к'ер'а кӧ т'ӧнэ, чь һэйэ жи we же бе стандьне».

### Мәсәлә т'охьме шин дьбэ

<sup>26</sup> У Иса гот: «П'адшати́я Хвэде мина ве йәке йә: Мәрвьәк т'охьм дьр'әшинә нав әрде. <sup>27</sup> У шәв у р'ож р'адьзе, р'адьбә, т'охьм шин дьбә, бьльнд дьбә у хвәха пе наһ'әсә кӧ әв чава дьбә. <sup>28</sup> Әрд жь хвә бәр дьдә, пешийе зил, паше сьмбьл, пәйр'а жи гәньме гьһишти сьмбьлда. <sup>29</sup> Гава кӧ бәр дьгьһижә, мәрвь иди дә'се давеже, чьмки дәма нандруне<sup>ф</sup> пер'а гьһишти́йә».

### Мәсәлә һ'әба т'охьме хәрдале<sup>ф</sup>

(*Мәтта 13:31-32;*  
*Луҕа 13:18-19*)

<sup>30</sup> У Иса гот: «Әм П'адшати́я Хвэде мина чь бышьбиньһн? Йан жи әм we бь к'ижан мәсәле шьровәкьһн? <sup>31</sup> Әв мина һ'әбәкә т'охьме хәрдале йә кӧ жь һ'әму т'охьмед кӧ сәр әрде тенә

чандьне һуртър ә. <sup>32</sup> Ле гава әв те чандьне дьгьһижә, жь һ'әму п'ыншар'а мәстър дьбә у ч'ьрәлед мәзын дьдә, өса кӧ тәйрәдед ә'змен дькарьһн хвә бьднэ бьһн сийа we».

### Иса бь мәсәлә хәбәр дьдә

(*Мәтта 13:34-35*)

<sup>33</sup> Бь гәләк мәсәлед бь ви авайи ванр'а һаҕас хәбәр дьда, чьҕас кӧ вана дькарьбу фә'м бькьра. <sup>34</sup> Бе мәсәлә ванр'а тыштәк нәдьгот, ле шагьртед Хвәр'а башқә һәр тышт шьровәдькьр.

### Иса фьртоне<sup>ф</sup> дьсәҕьр'инә

(*Мәтта 8:23-27; Луҕа 8:22-25*)

<sup>35</sup> We р'оже, гава р'о чу ава, Иса шагьртед Хвәр'а гот: «Әм дәрбази ви бәри голе бьһн». <sup>36</sup> Шагьрт жь ә'лаләте қәти́ян, к'әтьнә we қәйька кӧ Иса теда бу у вана Әв т'әви хвә бьр. Қәйькед дьһн жи т'әви Ви бун. <sup>37</sup> Дә ижар фьртонәкә<sup>ф</sup> мәзын ль ван р'әбу, пела өса ль қәйьке дьхьст, кӧ иди әв бу бь аве т'ьжи бьбуйа. <sup>38</sup> Ле Иса пашийа қәйькеда сәре Хвә данибу сәр бә'лги у р'әзабу. Вана Әв һ'ышйар кьр у готьне: «Дәрсдар<sup>ф</sup>, нә хәма Тәйә кӧ әм

онда дьбьн?» <sup>39</sup> Иса р'абу, ль байе һьлат у э'мьри сэр голе кър гот: «Бьсэкьнэ, кэр' бэ!» Фьртоне дани у һ'эму тышт сэдър'ин. <sup>40</sup> Иса ванр'а гот: «Һун чьма дьтърсьн? Һе чава бавэрийа вэ т'онэ?» <sup>41</sup> Сауэкэ гьран ль вана гьрт у һэвдөр'а готьн: «Гэло эв к'и йэ, кэ ба у гол жи ельми<sup>ф</sup> Ви дьбьн?»

### Иса йэки щьнак'эти қәнщ дькэ

(Матта 8:28-34; Лука 8:26-39)

**5** <sup>1</sup> Эвана дэрбази ви бэри гола Щэлиле бун у гь-ништьнэ т'опрахед Гьрасине. <sup>2</sup> Гава кө Иса жь қэйьке дэр-к'эт, һынге жь нав гор'ьстана мэрвьэк р'асти Ви хат, кө р'өһ'е һ'эрам пер'а бу. <sup>3</sup> Эв нав гор'ьстанада дьма у т'ө кэси иди нькарьбу бь зьншира жи эв гьреда. <sup>4</sup> Чьмки гэлэк шара эв бь қэйд у зьншира гьреда-бун, ле ви зьншир қэтандьбун у қэйд шкенандьбун. Т'ө кэси нькарьбу эв зэфт бькьра. <sup>5</sup> Т'ь-ме шэв у р'ож гор'ьстанада у сэре ч'ийа дькьрэ қир'ин, пе кэвьра хвэ бьриндар дькьр.

<sup>6</sup> Гава эви дурва Иса дит, бэзи, хвэ авитэ бэр ньга <sup>7</sup> у бь дэнгэки бьльнд кьрэ қир'ин у

готе: «Тө чь жь мьн дьхвази, Исайте Көр'е Хвэдейе Һэри Жорьн? Тө хатьре Хвэде ки, мьн нэдэ щэфел!» <sup>8</sup> Эви эв йэк дьгот, чьмки Иса дьготе: «Һэй р'өһ'е һ'эрам! Жь ви мэрьви дэрк'эвэ!» <sup>9</sup> Иса же пьрси у гот: «Наве тэ чь йэ?» Эви жи гот: «Наве мьн К'омэскэр э, чьмки эм гэлэк ьн». <sup>10</sup> У гэлэки р'эща жь Иса дькьр, кө ван жь we т'опрахе дэрнэхэ. <sup>11</sup> Вьр ль синге ч'ийе сурики бэразайи мэзын дьч'ерийа. <sup>12</sup> Р'өһ'ед һ'эрам р'эща жь Иса кьрьн у готьн: «Мэ бьшинэ нава бэраза, эм бьк'эвьнэ нава ван». <sup>13</sup> Эви жи изьн да ван, р'өһ'ед һ'эрам дэрк'этьн у к'этьнэ нава бэраза. Эв сури незики дө һ'эзар бэраза бу, эв жорда р'эви, хвэ жь кэнделда авитьнэ голе у хэньқин. <sup>14</sup> Бэ-разван р'эвин чунэ бажар у гонда, эв йэк гьли кьрьн. У бьнэли<sup>ф</sup> хатьн кө тыштед буйи бьбиньн. <sup>15</sup> У хатьнэ щэм Иса, дина хвэ дане, we эв мэрьве щьнак'этийи кө к'омэскэрэкэ щьна пер'а бу, к'ьнше ви ле, сэр һ'ьше хвэда хати р'уньшти йэ. Һынге эв тьрсийан. <sup>16</sup> Эвед кө эв йэк дитьбун щьмэ'тер'а гьли кьрьн, кө чь хатэ сэре ви

щънак'эти у бэраза. <sup>17</sup> Ынге вана р'эща жь Иса кър, кӧ Эв жь э'рде ван хэр'э.

<sup>18</sup> Гава Иса к'этэ қайьке, әви кӧ щънак'эти бу, р'эща же кър, кӧ т'эви Ви хэр'э. <sup>19</sup> Ле Иса нәһшт у жер'а гот: «Вәгәр'ә мала хвә у нәфәред мала хвә-р'а бежә, кӧ Хӧдан бона тә чь кър у чава ль тә хатә р'ә'ме». <sup>20</sup> Эв жи чу у дәстпекър чь кӧ Иса бона ви кърбу қәза Декаполиседа\* бәла кър у хәр кәс ә'щәбмайи дьма.

### Қизька мьри

#### у к'ӧлфәтәкә<sup>ф</sup> нәхвәш

(*Матта 9:18-26; Лука 8:40-56*)

<sup>21</sup> Гава Иса диса бь қайьке дәрбази ви бәре дьн бу, ә'лаләтәкә гьран ль дора Ви щъвийа. Гава Эв ль дәве голе бу, <sup>22</sup> йәки жь сәрверед к'ьниште кӧ наве ви Йайиро бу хатә щәм Ви, гава ви Иса дит, хвә авитә ньгед Ви, <sup>23</sup> гәләк р'эща же кър у гот: «Қизька мьн ль бәр мьрьне йә. Вәрә у дәстед Хвә дайнә сәр we, кӧ қәнщ бә у бьжи». <sup>24</sup> Иса р'әбу т'эви ви чу.

Ә'лаләтәкә гьран пәй Ви дьчу у тәнгаси дьданә Ви. <sup>25</sup> Вьр к'ӧлфәтәкә<sup>ф</sup> жи һәбу, кӧ донздәһ сале we бун, сәр хуне вәбьбу. <sup>26</sup> Эве гәләки дәсте һ'әкимада к'ьшандьбу у һ'әму һәбука хвә хәрщ кърбу, ле т'ӧ ч'арә ле нәбьбу у сәрда һе хьраб бьбу. <sup>27</sup> Эве дәрһәқа Исада бьһист, пыштева хатә нава ә'лаләте у ль к'ьнше Ви к'әт. <sup>28</sup> Чьмки әве дьле хвәда дьгот: «Һәгәр әз т'әне к'ьнше Ви жи к'әвьм, әзе қәнщ бьм». <sup>29</sup> У пер'а-пер'а хун же ч'ькийа у бәдәна хвәда т'әхмин кър, кӧ жь еша хвә қәнщ бу. <sup>30</sup> Иса дәстхвәда пе һ'әсийа кӧ қәватәк же чу, нав ә'лаләтеда зьвьр'и у пьрси: «К'е ль к'ьнщед Мьн к'әт?» <sup>31</sup> Шагьртед Ви готьн: «Тӧ дьбини кӧ ә'лаләт тәнгасийе дьдә Тә, ле Тӧ дьбежи: «К'е ль Мьн к'әт?»» <sup>32</sup> Ле Иса дор-бәре Хвә дьньһер'и кӧ бьбинә, к'е әв йәк кър. <sup>33</sup> Ынге к'ӧлфәт ль хвә һ'әсийа кӧ чь ль we қәвьми, бь тьрсе у ләрзәке хат хвә авитә бәр Ви у хәр тышт р'әст гот. <sup>34</sup> Иса wer'а гот: «Ә'вде! Бавәрийа тә тӧ қәнщ

\* <sup>5:20</sup> «Декаполис» бь зьмане йунани те фә'мкьрьне: «Дәһә Бажар», чьмки әва қәза бәрәда бь йәктийа дәһә бажара хатийә чекьрын.

кьри. Бь хер у съламэт хәр'э у жь еша хвэ қәнщ бэ».

<sup>35</sup> Иса һе хэбэр дьда, жь мала сәрвәре к'ьниште мәрвь һатьн у готьн: «Қиза тә мьр, иди зә'мәте нэдә Дәрсдар».

<sup>36</sup> Ле Иса гөһ нәда готьна ван, ви сәрәке к'ьништер'а гот: «Нәтырсә, т'әне бавәр бькә!»

<sup>37</sup> Эви нәһьшт кәс пәй Ви хәр'э, пештьри Пәтрус, Ақуб у Йүһ'әннайе бьре ви. <sup>38</sup> Чахе гьһиштьнә мала сәрәке к'ьниште, Иса дит we һевәрза ван ә, дьгьрин у дькьнә қар'э-қар'.

<sup>39</sup> Гава Эв к'этә һьндөр', ванр'а гот: «Чьма һун дькьн қалмә-қалм у дьгьрин? Зар' нәмьрийә, ле һеньжийә».

<sup>40</sup> Вана қәрфе хвэ пе дькьр.

Ле Иса һ'әму дәрхьстьнә дәрва, де у баве қизьке т'эви хәр се шагьртед Хвэ һьлдан у к'этә шийе кә қизьк ле бу.

<sup>41</sup> Дәсте қизьке гьрт у готә we: «Талита қум!» кә те фә'мкьрне: «Қизьк, әз тәр'а дьбежьм, р'абә!» <sup>42</sup> Қизьк пер'а-пер'а р'абу у гәр'ийа. Эв донздәһ сали бу. Эвед кә дитьн һ'ыше сәре ван чу.

<sup>43</sup> Иса һ'ышк т'әми ль ван кьр, кә ве йәке кәсир'а нәбежьн у ванр'а гот, кә хварьне бьдьнә we.

**Бажаре Ньсрәте, ль к'ө Иса мәзын бьбу, Ви қәбул накә**

*(Мәтта 13:53-58;*

*Луқа 4:16-30)*

**6** <sup>1</sup> Иса жь вьра дәрк'әт у чу ши-мьск'әне Хвә. Шагьртед Ви жи пәй Ви чун. <sup>2</sup> Чахе р'ожа шәмийе һат, Ви к'ьништеда дәст бь һинкьрне кьр у гәләка кә бьһист зәндәгьрти мабун у дьготьн: «Эви мәрвьви әв тышт жь к'ө анинә? Әв чь сәрвахти<sup>ф</sup> йә кә жер'а һатийә дайине? У әв чь к'әрәмәт ьн кә бь дәсте Ви дьқәвьмын? <sup>3</sup> Нә Әв нәшарә? Нә Әв көр'е Мәрйәме<sup>ф</sup> у бьре Ақуб<sup>ф</sup>, Йүсес, Щьһуда<sup>ф</sup> у Шьмһ'ун ә? Нә хушкәд Ви ль вьр нав мәда нә?» Бь ви авайи әв жь Ви чун.

<sup>4</sup> Иса ванр'а гот: «П'ехәмбәр т'ө шийи нә бевәдър ә, пештьри нава ши-мьск'әне хвә, мәрвьед хвә у мала хвәда». <sup>5</sup> Эви ль we дәре нькарьбу т'ө к'әрәмәт бькьра, т'әне дәсте Хвә дани сәр чәнд нәхвәша у әв қәнщ кьрн. <sup>6</sup> Эв сәр нәбавәрийа ван ә'щәбмайи ма.

**Шандьна һәр донздәһа**

*(Мәтта 10:5-15; Луқа 9:1-6)*

Иса ль гөндәд дор-бәра дьгәр'ийа у һин дькьр. <sup>7</sup> Ви хәр

донздәһ гази шәм Хвә кърьн, дәстпекър әш шот-шот шандьн у һ'өкөме ль сәр р'өһ'ед һ'ерам-р'а да ван. <sup>8</sup>Т'эми да ван у гот: «Бона р'е, пештьри шьвдара десте хвә т'ө тышти хвәр'а һьлнәдън: Нә нан, нә турьк у нә жи п'эра бәр пышта хвәда. <sup>9</sup>Чарьхед хвә бькьнә п'ийе хвә, ле дө дәст кьрас хвәр'а һьлнәдън». <sup>10</sup>Сәрда зедә кьр готә ван: «Әш мала кө һун бьк'эвьне, we маледа жи бьминьн, һ'эта һун жь ви щийи дәрк'эвьн. <sup>11</sup>Әш щийед кө вә қәбул нәкьн у гөһдарийа готьна вә нәкьн, жь вьр дәрк'эвьн у т'оза ньгед хвә давшиньн, вәки ванар'а бьбә шә'дәти».

<sup>12</sup>Әш жи р'е к'этьн чун у дан-насин дькърьн кө мәрвь жь гөнәкърьне вәгәр'ьн. <sup>13</sup>Вана гәләк шьн дәрдьхьстьн у р'ун<sup>ф</sup> ль гәләк нәхвәша дьдан у әв қәнщ дькърьн.

### Көштъна

#### Йуһ'әннайе ньхөмдар<sup>ф</sup>

(Мәтта 14:1-12; Луқа 9:7-9)

<sup>14</sup>Һеродәс п'адша әв йәк бь-хист, чьмки нав у дәнге Иса

дәрк'этьбу. Һьнәка дьгот: «Әва Йуһ'әннайе ньхөмдар<sup>ф</sup> ә жь нав мьрийа р'абуйә. Ләма жи пе ви к'эрәмәт тенә кърьне». <sup>15</sup>Ле һьнәка жи дьгот: «Әва Елийас<sup>ф</sup> ә». Һьнәкед дьн жи дьготьн: «Әва п'ехәмбәрәки мина п'ехәмбәрәд бәре йә». <sup>16</sup>Ле гава Һеродәс әв йәк бьхист, гот: «Әва әш Йуһ'әнна йә, йе кө мьн сәре ви лехьстийә, жь нав мьрийа р'абуйә!» <sup>17-18</sup>Чьмки Һеродәс хвәха Һеродийа жьна Филипойе бьре хвә стандьбу, ле Йуһ'әнна жер'а чәнд шара готьбу: «Нә р'аст ә кө тө жьна бьре хвә бьстини». Һеродәс жи к'әрби Һеродийае Йуһ'әнна дабу гьртъне, гьредабу у авитьбу кәле. <sup>19</sup>Ләма Һеродийае к'ин Йуһ'әннар'а дажот, дьхвәст ви бьдә көштъне, ле нькарьбу, <sup>20</sup>чьмки Һеродәс жь Йуһ'әнна дьтьрсийа у әв хвәй дькър. Әви заньбу кө Йуһ'әнна мәрвьәки р'аст у бөһөрти йә. Гава кө гөһдарийа готьна ви дькър, сәре ви т'эвиһәв дьбу\*, ле диса бь һ'әвас гөһ дьда готьна ви. <sup>21</sup>Ава шарәке мәщал вәбу. Һе-родәс бона р'ожа буйина хвә,

\* <sup>6:20</sup> Нав һьнәк дәстньвисарада дәвса «сәре ви т'эвиһәв дьбу» аһа йә: «Ви гәләк тышт дькър».

э'сылзада, сэрh'эзаред<sup>ф</sup> эскэра у гьрэгьред Шэлилер'а мэсрэф дани. <sup>22</sup> Гава қиза Һеродийайе к'этэ һндөр' у р'эқьси, эв йэк ль дьле Һеродэс у т'эглифкьрийед ль сэр сьфре р'уньшти хвэш һат. Һынге п'адше готэ қизьке: «Тө жь мьн чь бьхвази, эзе бьдьмэ тэ». <sup>23</sup> У ви жер'а сонд хвар гот: «Тө жь мьн чь бьхвази, эзе бьдьмэ тэ, һ'эта ниве п'адшатийа хвэ жи!» <sup>24</sup> Қизьк дэрк'этэ дэрва у чу жь дийа хвэ пьрси: «Эз чь бьхвазъм?» Дийа we жи гот: «Сэре Йуһ'әннайе ньхөмдар». <sup>25</sup> Қизьке лэзанд чу шэм п'адше у хвэстына хвэ жер'а гот: «Эз дьхвазъм кө тө ньһа сэре Йуһ'әннайе ньхөмдар ль сэр сьнийе бьди мьн». <sup>26</sup> П'адша гэлэки бэр хвэ к'эт, ле чьмки ль бэр т'эглифкьрийа сонд хварьбу, нэхвэст созе хвэ бэтал кьра. <sup>27</sup> П'адше пер'а-пер'а э'мьри сэр шэлат кьр, кө һэр'э сэре Йуһ'әнна бинэ. Шэлат жи чу кэледа, сэре ви лехьст <sup>28</sup> у ль сэр сьнийе ани у да кэч'ьке. Эwe жи эw һьлда бьр да дийа хвэ. <sup>29</sup> Гава шагьртед Йуһ'әнна эв йэк бьһистьн, һатьн щьнйазе ви бьрьн кьрьнэ т'ьрбе.

**Иса пенш һ'эзара т'ер дькэ**  
(*Матта 14:13-21; Лука 9:10-17;*  
*Йуһ'әнна 6:1-14*)

<sup>30</sup> У шанди<sup>ф</sup> вэгэр'ийанэ шэм Иса, һ'эму тыштед кө кьрьбун у һин кьрьбун жер'а готьн. <sup>31</sup> Иса ванр'а гот: «Дэ вэрьн эм т'эне һэр'ьнэ щики хэвлэ у һьнэки р'ьһ'эт бьн». Чьмки гэлэк дьһатьн у дьчун, вана мэшал нэдьдит кө нане хвэ жи бьхварана. <sup>32</sup> У эw т'эне бь қэйьке чунэ щики хэвлэ. <sup>33</sup> Ле гэлэка кө чуйина ван дит, эw нас кьрьн, жь һ'эму бажара пэйа бэзин у бэри ван гьһиштьнэ ви щийи. <sup>34</sup> Чахе Иса жь қэйьке дэрк'эт у Ви э'лалэтэкэ гьран дит, һынге гөне Ви ль ван һат, чьмки эw мина пэзед бе шьван бун. Дэстпекьр гэлэк тышт эw һин кьрьн. <sup>35</sup> Иди чьмки дэрэнг бу, шагьртед Иса һатьн у готьне: «Эв дэр щики хьки-хвэли йэ, вэхт жи иди дэрэнг э. <sup>36</sup> Щьм-э'те бэр'дэ кө эw һэр'ьнэ гөнд у бэргед дэр-дора у хвэр'а тыштед хварьне бьк'ьр'ьн». <sup>37</sup> Ле Иса ль ван вэгэр'анд у гот: «Һун хөрэк бьдьнэ ван!» Жер'а готьн: «Эм һэр'ьн баһе



досьд зиви<sup>ф</sup> нан бьк'ьр'ьн у ван бьднэ хварьне?»

<sup>38</sup> Иса ванр'а гот: «Һәр'ьн бьньһер'ьн, к'а чэнд нанед вэ һэнэ». Гава кө пе һ'эсийан, готьн: «Пенщ нан у дө м'эси һэнэ». <sup>39</sup> Ви э'мьр кьр кө һ'э-му жи к'ом-к'ом ль сэр гиһае шин р'уенен. <sup>40</sup> Эв жи к'ом-к'ом, сэд-сэд, пенши-пенши ль э'рде р'уныштьн.

<sup>41</sup> Иса һәр пенщ нан у һәр дө м'эси һьлдан, бәре Хвэ э'з-менда кьр шыкьри да, эв нан кәркьрн у да шагьртед Хвэ, вәки эв дайньнэ бәр э'лаләте. У һәр дө м'эси жи ль һ'эмуйа бәла кьр. <sup>42</sup> Һ'эмуйа хвар у т'ер бун. <sup>43</sup> Жь ван нан у м'эсийа донздәһ сәләйед т'ьжи һурьк бәрәв кьрн. <sup>44</sup> Йед кө жь ви нани хварьн вәкә пенщ һ'эзар мери бун.

### **Иса п'ийа ль сәр авер'а дьчә**

*(Матта 14:22-33;*

*Йуһ'әнна 6:15-21)*

<sup>45</sup> Дәстхвәда Эви п'ейи сәр шагьртед Хвэ кьр, кө бьк'эвнэ қәйьке у пешийа Ви дәрбази ви бәри голе, Бәйтсайдае бьн, һ'эта кө Хвәха шьмә'те вәр'екә. <sup>46</sup> Пәй вәр'екьрьнер'а р'абу чу сәре ч'ийе, кө дөа бькә.

<sup>47</sup> Гава кө р'о чу ава, қәйьк нава голеда бу у Иса т'әне дәве голе бу. <sup>48</sup> Иса дит кө шагьрт бер-к'ьшандьнеда гәләки зә'мәте дьк'ьшиньн, чьмки ба мьқабьли ван бу. Незики қәрәбәрбанге Иса сәр голер'а пәйа дьчу незики ван дьбу. Ви хвәст кө бәр ванр'а дәрбаз буйа, <sup>49</sup> ле чахе вана дит кө Иса сәр голер'а пәйа дьчә, ван т'ьре<sup>ф</sup> хәйаләкә<sup>ф</sup> кө дьбиньн у кьрнэ қир'ин. <sup>50</sup> Чьмки һ'эмуйа жи Эв дит у тьрсийан. Ле Иса we дәме дөнг да ван у гот: «Сәр хвэ бьн! Эз ьм. Нәтьрсьн!» <sup>51</sup> Һьнге Эв к'этә қәйьке щәм ван у ба сәкьни. Шагьрт э'щәбмайи ман, һ'ьше сәре ван чу, <sup>52</sup> чьмки эв қәвьмандьна ль сәр нен һе сәре ванда р'унәншьтбу, фә'ме ван дадаи бу.

### **Иса Щенисартеда нәхвәша**

#### **қәнщ дькә**

*(Матта 14:34-36)*

<sup>53</sup> Эв дәрбази ви бәри голе бун у ль алийе Щенисартева гьһиштнэ бәже<sup>ф</sup>, қәйик ши кьрн. <sup>54</sup> Гава жь қәйьке пәйа бун, шьмә'те пер'а-пер'а Иса нас кьр. <sup>55</sup> Эв т'эмамия we қәзайе вьрда-веда бәзин у дәстпекьрн нәхвәш ньвинава

данинэ ви шийе кӧ дьбьһис-  
тън Иса ле бу. <sup>56</sup> Һәр шийед  
кӧ Иса дьчуйе, һәгәр бажар  
буна, гӧнд буна, бӕргә буна,  
нәхвәш базарада даданин у  
һиви же дькьрын кӧ т'әне ль  
р'ишийед к'ьнщед Ви к'эвьн.  
У һ'әмуйед кӧ ле дьк'этън, жь  
нәхвәшийед хвә қәнщ дьбун.

**Р'ав-р'ьзьмед<sup>ф</sup> кал-бава  
у хәбәра Хвәде**  
(Матта 15:1-9)

**7** <sup>1</sup>Ферьсийа у һнәк қанун-  
занед кӧ жь Оршәлиме һа-  
тъбун, дора Иса гьртън. <sup>2</sup>Вана  
дит кӧ һнәкә жь шагьртед  
Ви бь дәстед һ'әрам, ава го-  
ти дәстнәшушти нан дьхвьн.  
<sup>3</sup>Ферьси у һ'әму щьһу<sup>ф</sup> пәй  
р'ав-р'ьзьмед<sup>ф</sup> кал у бавед хвә  
дьчьн, һ'эта кӧ дәстед хвә р'ьнд  
нәшон, нане хвә нахвьн <sup>4</sup>у жь  
базаре жи чь тиньн, һ'эта аве  
нәхьн, нахвьн\*. Гәләк ә'дәтед  
дьн жи һәнә, кӧ жь кал у бава

һьлданә у дьқәдиниьн: Мәсәлә,  
мина шуштъна т'аса, шәрбька у  
фьрақед сьфьрә майин\*\*. <sup>5</sup>Һн-  
ге ферьси у қанунзана жь Иса  
пьрсин: «Чьма шагьртед Тә пәй  
р'ав-р'ьзьмед кал у бава начьн у  
бь дәстед һ'әрам\* нан дьхвьн?»  
<sup>6</sup>Әви ль ван вәгәр'анд у гот:  
«Ишайа бона вә дӧр'уйа р'аст  
п'ехәмбәрти<sup>ф</sup> кьрийә! Чава кӧ  
һатийә нвьвисаре:

«Әва щьмә'та бь заре<sup>ф</sup> хвә  
қәдыре Мьн дьгьрә,  
ле дьле<sup>ф</sup> ван жь Мьн дур ә.

<sup>7</sup> Бадихәва<sup>ф</sup> Мьн дьһ'әбиньн,  
т'әмийед мәрьва чава қа-  
нунед Мьн щьмә'те һин  
дькьн»\*.

<sup>8</sup>Һун т'әмийед Хвәде дьһельн  
у пәй р'ав-р'ьзьмед мәрьвайийе  
дьк'эвьн». <sup>9</sup>У гот: «Һун т'әми-  
йед Хвәде р'ьнд дьдьянә алики,  
вәки р'ав-р'ьзьмед хвә хвәй  
кьн. <sup>10</sup>Мәсәлә, Муса готийә:  
«Қәдыре де у баве хвә бьгьрә»\*  
у «Әве кӧ гьлики қолайи де у

\* <sup>7:4</sup> Нав һнәк дәстньвисарада аһа йә: «У жь базаре жи тен, һ'эта аве сәр хвәда нәкьн, нен нахвьн».

\*\* <sup>7:4</sup> Нав һнәк дәстньвисарада әв жи һәйә: «Ӧса жи щиньвина».

\* <sup>7:5</sup> Нав дәстньвисаред қәнщда дәвса «бь дәстед һ'әрам» «дәстқь-лер» һәйә.

\* <sup>7:7</sup> Ишайа 29:13.

\* <sup>7:10</sup> Дәрк'этън 20:12; Қануна Дӧщари 5:16.

баве хвэр'а бежэ, гэрэке бе коштыне>\*\*.

<sup>11</sup> Ле хун дыбежын: «К'и кӧ дийа хвэ йан баве хвэр'а бежэ: Эw алик'арийа кӧ гэрэке жь мьн быгънижэ тэ, эw «qӧрбан»<sup>ф</sup> э», (аwа готи дийарик э кӧ Хwэдeр'а те дайине)

<sup>12</sup> хун иди нахельн кӧ эw тыштэки де у баве хвэр'а бькэ!

<sup>13</sup> Бь ви аwайи, хун бь ван р'aw-р'ъзьмед хвэйэ кӧ дэрбази ньсьлед<sup>ф</sup> ну дькьн, хэбэра Хwэде дькьнэ хwэли. У хун гэлэк тыштед аha дькьн».

**Тыштед кӧ мерьв дьх'эр'ьминьн**  
(*Матта 15:10-20*)

<sup>14</sup> Ынге Иса э'лалэт диса гази щэм Хwэ кьр у готэ ван: «хун х'эму гӧндарийа Мьн бькьн у фэ'м кьн.

<sup>15</sup> Тыштэки оса т'ӧнэ, кӧ жь дэрва бьк'эвэ нав-дье мерьв у ви бьх'эр'ьминэ, ле эw тыштед кӧ жь дьл дэртен, эw мерьв дьх'эр'ьминьн.

<sup>16</sup> Гӧ-не к'ейи бьхистьне хэйэ бьра бьбьхе»\*.

<sup>17</sup> Гава жь э'лалэте қэтиа hatэ мал, шагьртед Wi мэ'на we мэсэле же пьрсин.

<sup>18</sup> Иса

ль ван вэгэр'анд у гот: «хун не нагънижьнэ гьлийа? Чьма хун фэ'м накьн, чь кӧ жь дэрва дьк'эвэ нав-дье мерьв, нькарэ ви бьх'эр'ьминэ.

<sup>19</sup> Чьмки эw нэ кӧ дьк'эвьнэ дье ви, ле дьчьнэ зьке ви у жь wьр жи дэртен дэрва». (Бь ви аwайи Иса да к'ьфше, кӧ х'эму хwарьн жи х'элал<sup>ф</sup> ьн.)

<sup>20</sup> У гот: «Эw тыштед кӧ жь дье мерьв дэрдьк'эвьн, эw ви дьх'эр'ьминьн.

<sup>21</sup> Чьмки жь хьндӧр', жь дье мэрв фькьред хьраб дэрдьк'эвьн: Qави<sup>ф</sup>, дьзи, кӧштын, <sup>22</sup> зьнек'ари, тьмайи, хьраби, фелбази, толти, ч'э'ве хьраб, бӧхданбежи, к'ӧбари у беақьли.

<sup>23</sup> Эв х'эму тыштед хьраб жь дьл дэрдьк'эвьн у мерьв дьх'эр'ьминьн».

**Бавэрийа к'ӧлфэта Финикья Сурйайе**  
(*Матта 15:21-28*)

<sup>24</sup> Иса жь we дэре р'абу чу синоре Суре. Чу малэке у нэ-дьхwэст кӧ кэсэк пе бьх'эси-йа, ле нькарьбу Хwэ вэшарта.

<sup>25</sup> К'ӧлфэтэкэ кӧ қизька we р'ӧн'е х'эрамва гьрти бу, бона

\*\* <sup>7:10</sup> Дэрк'этын 21:17; Qануна К'ахинтийе 20:9.

\* <sup>7:16</sup> Нав дэстньвисаред хэрэ қэншда р'еза 16-а т'ӧнэ.

Иса пе һ'эсийа, лэз һат у хвэ авитэ бэр нгыед Ви. <sup>26</sup>Әв к'өлфэт йунан<sup>ф</sup> бу, ә'сьле хвэда жи жь Финикйа Сурйаие бу. Ве лава жь Иса кър, кӧ шьн жь қиза ве дәрхә. <sup>27</sup>Иса wer'a гот: «Бьһелә бьра пешийе зар' т'ер бьн, чьмки нә р'аст ә кӧ нан бәр зар'а һьлдын у бавежьнә бәр са». <sup>28</sup>Әве ль Ви вәгәр'анд у гот: «Бәле Хӧдан, нә сә жи ван һурькед бәр зар'айә бьне сьфреда майи дьхьн?» <sup>29</sup>Һьнге Әви к'өлфәтер'а гот: «Бона хатьре ве готьна тә, тӧ дькари һәр'и. Шьн жь қизька тә дәрк'әт». <sup>30</sup>К'өлфәт жи чу мала хвә, дина хвә даие, ве қизьк нав ньвинедә п'алда йә у шьн жи же дәрк'әтийә.

### Мәрвьәки кәр' у лал хәбәр дьдә

<sup>31</sup>Пәй ве йәкер'а Иса жь синоре Суре дәрк'әт, нава Сайдер'а дәрбаз бу, қәза Декаполисер'а һатә гола Шәлиле. <sup>32</sup>Мәрвьәки кәр' у лал анинә щәм Ви у лава же кърьн кӧ дәсте Хвә дайнә сәр ви. <sup>33</sup>Иса әв мәрвь жь ә'лаләте қәтанд, т'ьлийед Хвә кърьнә гӧһед ви, дәсте Хвәда т'укър, ль зьмане ви да. <sup>34</sup>У бәре Хвә ә'зменда кър,

к'әсәр һате у гот: «Әффата!» кӧ те фә'мкърьне: «Вәбә!» <sup>35</sup>У дәст хвәда гӧһед ви бьһистьн, зьмане ви вәбу у зәлал дәст бь хәбәрдане кър. <sup>36</sup>Иса т'әми ль ван кър, кӧ кәсир'а нәбежьн. Ле Әви чьқас т'әми ль ван дькър, вана һақас зедә бәла дькър. <sup>37</sup>Мәрвь гәләки ә'щәбмайи мабун у дьготьн: «Әви һ'әму тьшт қәнщ кър: Һьн кәр'а дьдә бьһистьне, һьн жи лала дьдә хәбәрдане».

### Иса чар һ'әзара т'ер дькә

(*Мәтта 15:32-39*)

**8** <sup>1</sup>Ван р'ожада диса ә'лаләтәкә гьран шьвийа. Тьштәки вани хварьне т'ӧнәбу кӧ бьхварана, Иса гази шагьртед Хвә кър у гот: <sup>2</sup>«Гӧне Мьн ль ве ә'лаләте те. Әв се р'ож ә т'әви Мьн ә у тьштәки вани хварьне т'ӧнә. <sup>3</sup>Һәгәр Әз ван бьр'чи вәр'екьмә малед ван, дьле вәне р'ева хвәва һәр'ә у жь ван һьнәк жи жь шийед дур һатьнә». <sup>4</sup>Шагьртед Ви ле вәгәр'андьн у готьн: «Ль ве бәр'ийе<sup>ф</sup> әме жь к'ӧ һақас нан дәст хьн, кӧ ве щьмә'те т'ер кьн?» <sup>5</sup>Иса жь ван пьрси: «Чәнд нанед вә һәнә?» Вана гот: «Һ'әфт». <sup>6</sup>Һьнге ә'мьр кър кӧ ә'лаләт сәр әрдә

р'уне. Эви эв һ'эфт нан һылдан шыкьри да, эв кәркьрын у паше данә шагьртед Хвә, кә дайньнә бәр ә'лаләте. Вана эв данинә бәр ван. <sup>7</sup> У чәнд мә'сийед ванә һур жи һәбун. Иса бона ван жи шыкьри да у гот: «Ван жи дайньнә бәр ә'лаләте». <sup>8</sup> Вана хвар у т'ер бун. Паше һ'эфт зәмбил жь һурькед бәрмаи бәрәв кьрын. <sup>9</sup> Эвед кә хварьн, вәкә чар һ'эзар мәрва бун. Гава кә Иса эв вәр'екьрын, <sup>10</sup> пер'а-пер'а т'эви шагьртед Хвә к'әтә қәйьке у чунә қәза Далманутайе.

**К'әрәмәтәке чава нишан  
жь ә'змана дьхвазьн**  
(Мәтта 16:1-4)

<sup>11</sup> Ферьси һатьн у дәстпекьрын Исар'а к'әтһнә дә'ве. Эв дыщеп'ьбандьн у жь Ви нишанәк жь ә'змен дьхвәстһн. <sup>12</sup> К'ур к'әсәр һатә у гот: «Чьма эва ньсьла ль нишанәке дьгәр'ә? Әз р'аст вәр'а дьбежьм кә ви ньсьлир'а нишанәк найе дайине». <sup>13</sup> Ви эв һыштһн, диса к'әтә қәйьке у дәрбази ви бәри голе бу.

**Һәвиртьр'шке<sup>ф</sup> ферьсийа  
у Һеродәс**

(Мәтта 16:5-12)

<sup>14</sup> Ижар шагьрта бир кьрьбу кә хвәр'а нан һылдана. Ль щәм ван, қәйькеда пештьри нанәки тыштәки вани хварьне т'өнәбу. <sup>15</sup> Иса т'әми да ван у гот: «Мьқати хвә бьн, һ'эвза хвә жь һәвиртьр'шке<sup>ф</sup> ферьсийа у өса жи йе Һеродәс\* бькьн». <sup>16</sup> Ле әвана нав һәвда хәбәр дьдан у дьготһн: «Нане мә т'өнә, ләма аһа дьбежә». <sup>17</sup> Исава ә'йан бу кә эв чь дьбежьн у ванр'а гот: «Һун чьма нав һәвда хәбәр дьдһн, кә нане вә т'өнә? Һәла һе һун фә'м накьн? У сәре вәда р'унани, һәла һе һун нагьһижьнә гьлийа?

<sup>18</sup> Ч'ә'ве вә һәнә, һун набиньн?

Гөһе вә һәнә, һун набьһен?

Чава найе бира вә\*, <sup>19</sup> чахе Мьн пенщ нан бона пенщ һ'эзар мәрва кәркьрын? Вә жь һурькед бәрмаи чәнд сәләйед т'ьжи бәрәв кьрын?» Ван ле вәгәр'анд у готһн: «Донздәһ». <sup>20</sup> «У гава Мьн һ'эфт нан бона чар һ'эзар мәрва кәркьрын,

\* 8:15 Нав һнәк дәстһнвисарада дәвса «Һеродәс» «Һеродәсийа» һәйә.

\* 8:18 Йерәмийа 5:21; Һәзәкийел 12:2.

вә чәнд зәмбилед т'ъжи бәр-майи бәрәв кърьн?» Ван гот: «Һ'эфт». <sup>21</sup> Иса ванр'а гот: «Ле чьма һун һе фә'м накьн?»

### **Ль Бәйтсайдае қәншкърьна корәки**

<sup>22</sup> У әв һатьнә Бәйтсайдае. Һьнәка мәрвьәки кор ани шәм Иса у лава же кърьн, кӧ дәсте Хвә дайнә сәр ви. <sup>23</sup> Әви жи дәсте мәрвье кор гьрт, жь гӧнд дәрхьстә дәр, т'уйи ч'ә'вед ви кърьн у дәстед Хвә данинә сәр ви, пьрси: «Тӧ тыштәки дьбини?» <sup>24</sup> Әви жи ль жоре ньһер'и у гот: «Әз мәрвьа дьбиньм, ле мина дара нә, кӧ дьгәр'ьн». <sup>25</sup> Диса Иса дәстед Хвә данинә сәр ч'ә'вед ви, кор зур' бу ньһер'и у ч'ә'вед ви вәбун, һәр тышт зәлал дит. <sup>26</sup> Иса әв шандә мала ви у жер'а гот: «Нәк'әвә нава гӧнд»\*.

### **Пәтрус шә'дәтийе ль сәр Иса дьдә**

*(Матта 16:13-20; Луца 9:18-21)*

<sup>27</sup> Иса т'әви шагьртед Хвә чу гӧндед Қәйсәрийа Филипойе у р'еда жь шагьртед Хвә пьрси:

«Бь т'әхмина мәрвьа Әз к'и мә?» <sup>28</sup> Ван ле вәгәр'анд у готьн: «Һьнәк дьбежьн <Йуһ'әннайе ньхӧмдар ә>, һьнәкед дьн дьбежьн <Елийас ә>, һьнәкед майин жи дьбежьн <йәк жь п'ехәмбәра йә>». <sup>29</sup> Иса жь ван пьрси: «Ле һун чь дьбежьн? Бь т'әхмина вә Әз к'и мә?» Пәтрус ле вәгәр'анд у готе: «Тӧ Мәсиһ и». <sup>30</sup> Әви т'әми ль ван кър, кӧ дәрһәқа Вида кәсир'а тыштәки нәбежьн.

### **Иса дәрһәқа шәфа у мьрьна Хвәда дьбежә** *(Матта 16:21-28; Луца 9:22-27)*

<sup>31</sup> Пәй ве йәкер'а Иса дәст-пекьр шагьртед Хвә һин кър, кӧ гәрәке Кӧр'е Мервь гәләки шәфе бьк'ьшинә, жь алиие р'успийа<sup>ф</sup>, сәрәкед к'аһина у қанунзанада бе т'әхсиркърьне<sup>ф</sup> у кӧштьне, ле р'ожа сьсийа жь мьрьне р'абә. <sup>32</sup> Әви әв йәк зәлал гот. Һьнге Пәтрус Әв да алики у ле һьлат. <sup>33</sup> Ле Иса сәр мьле Хвәва зьвьр'и у ль шагьртед Хвә ньһер'и, ль Пәтрус һьлат у гот: «Жь бәр ч'ә'ве Мьн бәтавәбә, щьно!

\* 8:26 Нав һьнәк дәстньвисарада әв жи һәйә: «Гӧндда кәсәкир'а тыштәки нәбежи».

Чъмки нет-фькбра тә нә жь Хвәде йә, ле жь мәрвьайе йә».

<sup>34</sup> Паше Иса гази ә'лаләте у шагъртед Хвә кьрын, ванр'а гот: «Һәгәр йәк дьхвәзә ль пәй Мьн бе, бьра хвә инк'ар<sup>ф</sup> кә, хаче<sup>ф</sup> хвә һьлдә у пәй Мьн бе. <sup>35</sup> Чъмки к'и кә дьхвәзә ә'мьре хвә хьлаз кә, әве ви онда кә у к'и кә ә'мьре хвә бона Мьн у Мьзгинийе онда кә, әве ви хьлаз кә. <sup>36</sup> Чь фәйдә һәгәр мәрвь т'әмамия дьнийәе қазьнщ кә, ле ә'мьре хвә онда кә? <sup>37</sup> Йан жи мәрвь чь дькарә бәр ә'мьре хвәва бьдә? <sup>38</sup> Әве кә Мьн у хәбәрәд Мьн нав ви ньсьле хальфи<sup>ф</sup> у гөнәк'арда шәрм һ'әсаб кә, Көр'е Мервь жи ве ви шәрм һ'әсаб кә, гава р'умәта Баве<sup>ф</sup> Хвәва т'әви мьляк'әтед пироз<sup>ф</sup> бе».

**9** <sup>1</sup> У Әви ванр'а гот: «Әз р'аст вәр'а дьбежъм, кә һьнәкед ль вьр сәкьни һәнә ве мьрьне нәбиньн, һ'әта кә нәбиньн П'адшатија Хвәде бь қәват те».

### **Шагърт Иса нава нур у р'умәтеда дьбиньн**

*(Мәтта 17:1-13; Луқа 9:28-36)*

<sup>2</sup> Пәй шәш р'ожар'а Иса т'әви Хвә Пәтрүс, Ақуб у Йүһ'әнна

һьлдан у р'акьрынә ч'ийаки бьльнд, ль вьр әв т'әне бун. Һьнге р'әнге Ви ль бәр ч'ә'ве ван һатә гөһастьне. <sup>3</sup> К'ьнщед Ви өса чил-қәрқаш бун у һақаси бьрьқин, кә ль сәр р'уйе ә'рде т'ө тыштәки к'ьнщсь-пикьрьне нькарьбу әв һақаси сьпи бькьра. <sup>4</sup> Һьнге Елийас у Муса ванва хөйа бун у т'әви Иса хәбәр дан. <sup>5</sup> Пәтрүс Исар'а гот: «Дәрсдар, чава р'ьнд ә кә әм вьр ьн! Дә әме се һ'олька чекьн, йәке Тәр'а, йәке Муса-р'а у йәке жи Елийаср'а». <sup>6</sup> Әв өса тьрсийа бун, кә Пәтрүс ньзаньбу чь бежә.

<sup>7</sup> Ве гаве ә'врәк дәрк'әт ль сәр ван кьрә си у дәнгәк жь ә'вр һат: «Әв ә Көр'е Мьни дәләл! Гөһдарийа Ви бькьн!» <sup>8</sup> Ньшкева шагърта ль дора хвә ньһер'и, пештьри Иса кәсәк нәдитьн.

<sup>9</sup> Чахе жь ч'ийе дьһатьнә хваре, Иса т'әми ль ван кьр гот: «Чь кә вә дит т'ө кәсир'а нәбежьн, һ'әта кә Көр'е Мервь жь мьрьне р'анәбә». <sup>10</sup> Шагърта әв т'әми хвәй кьр у жь һөвдө пьрсин, к'а мә'на ве р'абуна жь мьрьне чь йә. <sup>11</sup> У вана же пьрси: «Гәло чьма қанунзан дьбежьн пешийе гәрәке Елийас

бе?»\* 12 Эви жи ванр'а гот: «Р'аст э, пешийе Елйасе бе у һәр тышти ве диса бинэ ши. Ле чьма һатийэ нъвисаре, кӧ Кӧр'е Мерьв ве гэлэки шәфе бык'ышинэ у бе бехӧрмәткьрьне? 13 Ле Эз вәр'а дьбежым, Елйас һатийэ жи у чава кӧ бона ви һатьбу нъвисаре, ӧса жи сәре ви кьрьн, чава кӧ дьле ван хвәст».

**Иса кӧр'ькәки шынак'әти  
қәнш дькә**

(*Матта 17:14-21;*

*Луқа 9:37-43a)*

14 Гава вәгәр'ийанэ щәм шагьртед дьн, дитьн ль дора ван ә'лаләтәкә гьран гьртийэ у қанунзан жи ванр'а к'әтьбунә дә'ве. 15 Ынге т'әмамийа ә'лаләте кӧ Иса дит, гәләки ә'шебмайи ма, бәрбь Ви бәзин у сылав дане. 16 Иса жь шагьрта пьрси: «Һун бона чь ванр'а к'әтьнә дә'ве?»

17 Жь нав ә'лаләте мәрвьәки ле вәгәр'анд у гот: «Дәрсдар! Мьн кӧр'е хвәйи р'ӧһ'е лалва гьрти ани щәм Тә. 18 К'идәре кӧ пе дьгьрә ви ә'рде дьхә, к'әф дев дьк'әвә, дьран ле

дькьнә ч'ьркә-ч'ьрк у р'әқ дьбә. Мьн һиви жь шагьртед Тә кьр, кӧ ви р'ӧһ'и дәрхьн, ле нькарьбун».

19 Иса ль ван вәгәр'анд у гот: «Һәй ньсьле нәбауәр! Һ'әта к'әнге Эзе т'әви вә бьм? Һ'әта к'әнге Эзе ль вә сәбьр кьм? Ви биньнә щәм Мьн».

20 Вана кӧр'ьк анинә щәм Иса. Гава кӧ р'ӧһ'е һ'әрам Иса дит, пер'а-пер'а кӧр'ьк вәч'ь-р'ьканд. Эв к'әтә ә'рде, к'әф дев к'әт у п'ьрпьти. 21 Иса жь баве ви пьрси: «Жь к'әнгева әв йәка т'әви ви дьқәшымә?» Эви гот: «Жь зар'отийеда.

22 У ви р'ӧһ'и гәләк шара әва авитийә нава егьр у аве, кӧ ви быкӧжә. Ле һәгәр жь дәсте Тә те, тыштәки быкә бьра гӧне Тә ль мә бе, алик'арийа мә быкә!» 23 Иса вир'а гот: «Тә гот чь? «Һәгәр жь дәсте тә те?» Бона йе бауәр дькә һәр тышт дьбә». 24 Ве гаве баве кӧр'ьк кьрә қир'ин у гот: «Эз бауәр дькьм. Алик'арийа нәбауәрийа мьн быкә!» 25 Гава Иса дит кӧ ә'лаләт дьбәзә, т'опи сәр Ви дьбә, ль р'ӧһ'е һ'әрам һьлат у гот: «Һәй р'ӧһ'е кәр' у

\* 9:11 Малахи 4:5.



лал, Эз э'мври сэр тэ дькым: Жь көр'ьк дэрк'эвэ у шарэкэ дьн нэк'эви нава ви!»<sup>26</sup> Р'öh' кьрэ қир'ин, көр'ьк қайим вэч'ьр'ьканд же дэрк'эт. У көр'ьк бу мина мьрийа, өса кө гэлэка дьгот: «Эв мьр!»<sup>27</sup> Ле Иса дәсте ви гьрт, эв р'акьр. Көр'ьк жи р'абу сэкьни.<sup>28</sup> Чахе Иса к'этэ мале, шагьртед Ви башқэ же пьрсин: «Мэ чьма нькарьбу эв шьн дэрхьста?»<sup>29</sup> Иса ль ван вэгэр'анд у гот: «Шьне ви шур'эйи бь т'ө тышти дэрнайе, пештьри бь дөа\*».

**Иса диса дэрһэқа  
мьерна Хвэда дьбежэ**

(Мәтта 17:22-23;  
Луқа 9:43б-45)

<sup>30</sup> Жь ььр чунунав Шэлилер'а дэрбаз бун. Иса нэдьхвэст кө кэс ве йэке бьһ'эсэ,<sup>31</sup> чьмки Эви шагьртед Хвэ һин дькьр у ванр'а дьгот: «Көр'е Мерьв ве бьк'эвэ дәсте мэрьва, эве Ви бькөжьн, ле пэй көштьнер'а р'ожа сьсийа ве р'абэ». <sup>32</sup> Ле вана эв готьн фэ'м нэдькьр, дьтьрсийан жи кө жь Ви бь-пьрсьн.

**К'и йэ йе һәри мәзын?**

(Мәтта 18:1-5; Луқа 9:46-48)

<sup>33</sup> У эв хатьнэ Кэфэрнахуме. Гава Иса малда бу, жь шагьрта пьрси: «Һун р'еда бона чь һэвр'а к'этьбунэ дэ'ве?»<sup>34</sup> Вана дэнге хвэ нэкьр, чьмки р'еда нав һэвда хэбэр дабун, к'а жь ван к'и йэ йе һәри мәзын.<sup>35</sup> Иса р'уньшт, гази һәр донз-дөһа кьр у ванр'а гот: «Һэгәр йэк дьхвазэ бьбэ йе пеш, гэрэке эв бьбэ йе һәри паш у хөламе һ'эмуйа». <sup>36</sup> У дәсте зар'окэке гьрт, нав ванда да сэкьнандьне, паше эв зар'ок да һ'эмеза Хвэ у ванр'а гот: <sup>37</sup> «К'и зар'окэкэ аһа бь наве Мьн қэбул кэ, эв Мьн қэбул дькэ. У к'и кө Мьн қэбул кэ, эв нэ кө Мьн, ле Йе кө Эз шандьмэ қэбул дькэ».

**Йе нэ мьқабыли мә йэ,**

**эв пышта мә йэ**

(Луқа 9:49-50)

<sup>38</sup> Йуһ'әнна Исар'а гот: «Дэрс-дар! Мэ мэрьвэк дит кө бь наве Тэ шьн дэрдьхьстьн, ле мэ кьр кө эм нәһельн, чьмки эв пэй мә

\* 9:29 Нав дәстньвисаред пашвэхтийеда аһа йэ: «Пештьри бь дөа у р'ожийе».

найе». <sup>39</sup> Ле Иса гот: «Пешийе ль ви нэгърын. Кэсэк т'онэ кӧ бы наве Мьн к'эрэмэтэке бькэ у пер'а-пер'а бькарьбэ һындава Мьнда хьраб хэбэр дэ. <sup>40</sup> Чьмки әве кӧ нэ мьқабыли мә йә, әв пышта мә йә. <sup>41</sup> Әз р'аст вэр'а дьбежъм, әве кӧ т'асә ав бьдә вә бона хатъре ве йәке, кӧ һун п'ара Мәсигъ ын, әве һәде хвә қәт онда нәкә.

### Жьр'едәрхьстын

(*Мәтта 18:6-9; Луқа 17:1-2*)

<sup>42</sup> К'и кӧ жь ван бьч'ука йәки, йе кӧ бавәрийа хвә Мьн тинэ жь р'е дәрхә, вир'а һе қәнщ ә, кӧ бәрәшәк стуйе вива бе гьредане у бе авитьне нава бә'ре. <sup>43-44</sup> Һәгәр дәсте тә, тә жь р'е дәрдхә, ви жекә! Бона тә һе қәнщ ә, кӧ тӧ қоп бьк'әви жийине, нә кӧ дӧ дәстед тә һәбьн у һәр'и шә'ньме<sup>ф</sup>, нава агьре кӧ қәт натәмьрә.\* <sup>45-46</sup> Һәгәр ньге тә, тә жь р'е дәрдхә, ви жекә!

Бона тә һе қәнщ ә, кӧ тӧ бе ньг бьк'әви жийине, нә кӧ дӧ ньгед тә һәбьн у бейи авитьне шә'ньме. <sup>47</sup> Һәгәр ч'ә'ве тә, тә жь р'е дәрдхә, ви дәрхә! Бона тә һе қәнщ ә, кӧ тӧ бь ч'ә'вәки бьк'әви П'адшатийа Хвәде, нә кӧ дӧ ч'ә'ве тә һәбьн у бейи авитьне шә'ньме. <sup>48</sup> Ве дәре «әве жь кӧрме нәмьри бенә котьне у агьре жи нәтәмьрә»\*. <sup>49</sup> Чьмки һәр мәрвьәке бь егьр бе хвекьрьне\*. <sup>50</sup> Хве тыштәки қәнщ ә. Ле һәгәр хве шор'айийа хвә онда кә, һуне чава диса шор'айийа ве биньнә щи? Бьра тә'ма хве нава вәда бә у бь һәвр'а ә'длайийеда бьжин».

### Пьрса жьнбәр'дане

(*Мәтта 19:1-12; Луқа 16:18*)

**10** <sup>1</sup> Иса жь вьр р'абу чу синоре Щьһустане у дәрбази ви алийе ч'әме Урдӧне бу. Диса ә'лаләте ль дора Ви гьрт у чава ә'дәте Ви бу, Әви диса

\* 9:43-44, 45-46 Нав һнәк дәстньвисарада, р'еза 48-а хьлазийа р'еза 44 у 46-ада те вәк'ьландьне: «Ве дәре әве жь кӧрме нәмьри бенә котьне у агьре жи нәтәмьрә».

\* 9:48 Ишайа 66:24.

\* 9:49 Нав һнәк дәстньвисарада әв жи һәйә: «У һәр қӧрбане бь хве бе хвекьрьне». Һнәк аһа фә'м дькьн: «Чьмки һәр мәрвьәке бь егьр бе сафикьрьне, чава кӧ һәр қӧрбан бь хве те хвекьрьне». Қануна К'аһинтийе 2:13.

эw нин кърн. <sup>2</sup> Жь ферьсийа  
 һнэк незики Wi бун у же пър-  
 син, wэки Wi быщер'ьбиньн:  
 «Гэло ль гора Qануне р'аст  
 э, кӧ мер жьна хwэ бэр'дэ?»  
<sup>3</sup> Иса шаба ван да у гот: «Муса  
 чь т'эми да wэ?» <sup>4</sup> Wана гот:  
 «Муса изьн да, кӧ мер к'ахаза  
 жьнбэр'дане бьньвисэ у жьне  
 бэр'дэ»\*. <sup>5</sup> Ле Иса ванр'а гот:  
 «Жь дэст сэрһ'ышкийа wэ Муса  
 эв т'эми wэр'а ньвиси. <sup>6</sup> Ле сә-  
 ре серида, wэхте э'фьрандые  
 Хwэде эw <qсыме мер у жьнеда  
 хӧльqандьн»\*. <sup>7</sup> <Бона ве йәке  
 мере де у баве хwэ бьһелә, хwэ  
 ль жьна хwэ бьгьрә <sup>8</sup> у һәр дӧ  
 we бьбьнә бәдәнәк»\*. Аwa иди  
 эw нә дӧдӧ нә, ле бәдәнәк ьн.  
<sup>9</sup> Бона ве йәке әвед кӧ Хwэде  
 эw кърнә йәк, бьра мәрвь ван  
 жь һәвдӧ нәqәтинә». <sup>10</sup> Гава эw  
 диса малда бун, шагьрта бона  
 ве мәсәле жь Wi пьрсин. <sup>11</sup> Иса  
 ванр'а гот: «К'и кӧ жьна хwэ  
 бэр'дә у йәкә дьн бьстинә, һьн-  
 дава weда зьнек'арийе дькә <sup>12</sup> у  
 һәгәр жьн жи мере хwэ бэр'дә  
 у йәки дьн бьстинә, зьнек'а-  
 рийе дькә».

### Иса дӧа зар'ока дькә

(*Мәтта 19:13-15;*

*Луqа 18:15-17)*

<sup>13</sup> Аwa зар'ок данинә щәм  
 Иса, кӧ дәсте Хwэ дайнә сәр  
 ван, ле шагьрт ль йед данин  
 һьлатьн. <sup>14</sup> Гава кӧ Иса эв йәк  
 дит, һерс к'эт у ванр'а гот:  
 «Бьра эw зар'ок бенә щәм Мьн,  
 пешийа ван нәгьрн, чьмки  
 П'адшатийа Хwэде п'ара йед  
 аһа йә. <sup>15</sup> Әз р'аст wэр'а дьбе-  
 жьм, к'и П'адшатийа<sup>ф</sup> Хwэде  
 мина зар'окәке qәбул нәкә,  
 эw т'ӧ шар нак'эwә нава we».  
<sup>16</sup> Паше эw зар' данә һ'әмеза  
 Хwэ, дәсте Хwэ дани сәр ван  
 у дӧа ль ван кър.

### Йәки дәwләти ль жийина<sup>ф</sup>

#### һ'әта-һ'әтайе дьгәр'ә

(*Мәтта 19:16-30;*

*Луqа 18:18-30)*

<sup>17</sup> Гава Иса р'ийа Хwэда дьчу,  
 йәк бәрбь Wi бәзи, чу ль бәр  
 Wi чок да у же пьрси: «Дәрс-  
 дарә qәнщ, әз чь бькьм, wәки  
 жийина һ'әта-һ'әтайе war бьм?»  
<sup>18</sup> Иса wir'а гот: «Тӧ чьма Мьн-

\* <sup>10:4</sup> Qануна Дӧщари 24:1-3.

\* <sup>10:6</sup> Дәстпәбун 1:27; 5:2.

\* <sup>10:8</sup> Дәстпәбун 2:24.

р'а дьбежи қәнш? Қәнш т'әне Хвәде йә, пештьри Wi кәсәки дьн т'өнә. <sup>19</sup> Тө т'әмийа зани: «Нәкөжә, зьнек'арийе нәкә, нәдьзә, шә'дәтийа дәрәw нәдә, худана хәлқе нәхвә, қәдьре де у баве хвә бьгьрә\*».

<sup>20</sup> Әwi гот: «Дәрсдар, әв һ'әму жи мьн жь шаһьлтийа хвәда хвәй кьрьнә». <sup>21</sup> Иса ле нь-һер'и, әw һ'ыз кьр у готе: «Һе кемасикә тө һәйә. һәр'ә чи тө һәйә бьфьрошә, бәлайи фәқира кә, һьнге хьзна тө we ль ә'змен һәбә. У пәй Мьн wәрә\*». <sup>22</sup> Ль сәр we готьне әwi р'әнг авит, мә'дәкьри чу, чьмки гәләк һәбука wi һәбу.

<sup>23</sup> Иса ль дора Хвә ньһер'и у шагьртед Хвәр'а гот: «Дәw-ләтийар'а чьқас зә'мәт ә, кә бьк'әвьнә П'адшатийа Хвәде!» <sup>24</sup> Шагьрт сәр ван готьнед Wi ә'щәбмайи ман, ле Иса диса думайи кьр у гот: «Лаwно! Wanр'а чьқас зә'мәт ә, бьк'әвьнә П'адшатийа Хвәде, йед

кө гөмана хвә датиньнә сәр дәwләта хвә!»\* <sup>25</sup> Дәwә we қөла дәрзийер'а һе р'ьһ'әт дәрбаз бә, нә кө дәwләти бьк'әwә П'адшатийа Хвәде». <sup>26</sup> Шагьрт гәләки ә'щәбмайи ман у һәвр'а готьн: «Иди к'и дькарә хьлаз<sup>ф</sup> бә?» <sup>27</sup> Иса ль wan ньһер'и у гот: «Әw тышт жь дәсте мерьв найе, ле жь дәсте Хвәде те, чьмки Хвәде дькарә һәр тышти бькә». <sup>28</sup> Ынге Пәтрус дәстпекьр жер'а гот: «Аwа мә һ'әму тышт һьштийә у пәй Тә һатьнә». <sup>29</sup> Иса wanр'а гот: «Әз р'аст wәр'а дьбежьм, т'ө кәс т'өнә кө бона Мьн у Мьзгинийе мал, йан бьра, йан хушк, йан де, йан бав, йан зар', йан ә'рдәд хвә һьштьбьн, <sup>30</sup> у ль we дьне сәд қат мала, бьра, хушка, дийа, зар'а у ә'рда т'әви зерандьна нәстинә у дьнйа дьнда жи жийина һ'әта-һ'әтайе. <sup>31</sup> Ле гәләкед пеш we бьбьнә йед паш у йед паш we бьбьнә йед пеш».

\* <sup>10:19</sup> Дәрк'әтьн 20:12-16; Қануна Дөщари 5:16-20.

\* <sup>10:21</sup> Нав һьнәк дәстньвисарада аһа йә: «У хаче хвә һьлдә, пәй Мьн wәрә».

\* <sup>10:24</sup> Нав һьнәк дәстньвисарада «йед кө гөмана хвә данинә сәр дәw-ләта хвә» т'өнә.

**Иса шара сьсийа дэрһәҗа  
мьрна Хвәда дьбежә**

*(Мәтта 20:17-19;*

*Луҗа 18:31-34)*

<sup>32</sup> Ава әв ль сәр р'е бун у һәвраз дьчунә Оршәлиме, Иса ль пешийа ван дьчу, шагьрт ә'щәбмайи дьман у әвед ль пәй дьһатьн дьтьрсийан. Әви диса һәр донздәһ данә алики у дәстпекьр әв тьштед кә we сәре Ви бьқәвьмийана ванр'а гот: <sup>33</sup> «Бьбьһен! Әм һәвраз дьчьнә Оршәлиме. Көр'е Мерьв we бь-к'әвә дәсте сәрәкед к'аһина у қанунзана. Әwe жер'а көштьне дәрхьн у Ви бьдьнә дәсте нә-щьһуйа<sup>ф</sup> <sup>34</sup> у әwe қәрфе хвә ль Ви бькьн, т'укьне, бьдьнә бәр қамчийа, Ви бькөжьн. У р'ожа сьсийа we жь мьрне р'абә».

**Хвәстьна Ақуб у Йуһ'әнна**

*(Мәтта 20:20-28)*

<sup>35</sup> Ёнгә көр'ед Зәбәди, Ақуб у Йуһ'әнна незики Иса бун у готьне: «Дәрсдар, әм дьхвазьн wәки әм жь Тә чь һиви кьн, Тә бона мә бьки». <sup>36</sup> Әви жи жь ван пьрси: «Һун чь дьхвазьн кә Әз бона wә бькьм?» <sup>37</sup> Ван жер'а гот: «Изьне бьдә кә р'у-мәта Тәда жь мә йәк ль мьле

Тәйи р'асте, йе дьн жи ль мьле Тәйи ч'әпе р'уне». <sup>38</sup> Иса ванр'а гот: «Һун ньзаньн чь дьхвазьн. Гәло һун дькарьн жь we к'әсе вәхьн, йа кә Әзе вәхьм? Йан жи бь we ньхөмандьне бенә нь-хөмандьне бь к'ижане Әзе бемә ньхөмандьне?» <sup>39</sup> Вана жер'а гот: «Әм дькарьн». Иса ванр'а гот: «Бәле һуне вәхьн жь we к'аса кә Әзе вәхьм у бенә нь-хөмандьне бь we ньхөмандьна кә Әзе пе бемә ньхөмандьне, <sup>40</sup> ле изьна ль мьле Мьни ч'әп у р'асте р'уньштьне нә дәсте Мьнда йә. Әв щи бона ван ьн, к'ижанар'а һатьнә һазьркьрне». <sup>41</sup> Гава һәр дәһә шагьртед дьн әв йәк бьһист, дьле ван жь Ақуб у Йуһ'әнна ма. <sup>42</sup> Ле Иса әв гази щәм Хвә кьрн у гот: «Һун заньн йед кә нав мьләтада<sup>ф</sup> сәрвер тенә һ'әса-бе, сәрдәстийе ль ван дькьн у гьрәгьред ван жи һ'өкөми сәр ван дькьн. <sup>43</sup> Ле нава wә-да бьра өса нибә. К'и кә нава wәда дьхвазә бьбә йе мәзын, гәрәке бьбә бәрдәстийе wә. <sup>44</sup> У к'и кә нава wәда дьхвазә бьбә пеш, гәрәке бьбә хөламе һ'әмуя. <sup>45</sup> Чьмки Көр'е<sup>ф</sup> Мерьв жи нәһатийә кә жер'а бәрдәс-тийе бькьн, ле wәки Әв Хвәха

бәрдәстийе бькә у ә'мьре Хwә бьдә кӧ гәләка бьк'ьр'ә».

**Иса п'арскьрәки кор  
бажаре Әриһайеда қәнш дькә**

(*Мәтта 20:29-34;*

*Луқа 18:35-43)*

<sup>46</sup> Паше әw һатьнә Әриһа-  
йе. Гава Иса т'әви шагьртед  
Хwә у ә'лаләтәкә гьранва жь  
бажер дәрк'әт, Кӧр'е Тимәйо,  
Бартимәйойе кор\* ль сәр р'е  
р'уньштьбу п'арс дькьр. <sup>47</sup> Га-  
ва бьһист кӧ Исайе Ньсрәте  
дәрбаз дьбә, дәстпекьр кьрә  
қир'ин у гот: «Исайе Кӧр'е<sup>ф</sup>  
Давьд, ль мьн вәрә р'ә'ме!»  
<sup>48</sup> Гәләка ль ви һьлат, вәки  
дәнге хwә бьбьр'ә, ле әви һе  
дькьрә қир'ин у дьгот: «Кӧр'е  
Давьд, ль мьн вәрә р'ә'ме!»  
<sup>49</sup> Иса сәкьни у гот: «Гази ви  
кьн». Гази йе кор кьрьн у вир'а  
готьн: «Ч'ә'ве тә р'оньк! Р'абә  
сәр хwә, гази тә дькә». <sup>50</sup> Әви  
жи п'оте хwә авит, банзда сәр  
хwә у һатә шәм Иса. <sup>51</sup> Иса же  
пьрси: «Тӧ чь жь Мьн дьхвази  
кӧ Әз бона тә бькьм?» Йе кор  
жер'а гот: «Дәрсдар, дьхвазьм  
ч'ә'вед мьн бьбиньн». <sup>52</sup> У Иса

жер'а гот: «Һәр'ә, бawәрийа тә  
тӧ қәнш кьри». У ви чахи ч'ә'-  
вед ви дитьн, да пәй Иса чу.

**Иса бь р'умәт  
дьк'әвә Оршәлиме**

(*Мәтта 21:1-11; Луқа 19:28-40;*

*Йуһ'әнна 12:12-19)*

**11** <sup>1</sup> Гава әw незики Оршә-  
лиме бун у гьһиштьнә  
ч'ийайе<sup>ф</sup> Зәйт'уне у гӧндед  
Бәйтфаше у Бәйтанийае, һнге  
Иса дӧ шагьртед Хwә шандьн <sup>2</sup> у  
ванр'а гот: «Һәр'ьнә ви гӧнде  
пешбәри хwә. Һәма чава кӧ  
һун бьк'әвьне, һуне щә'шькәкә  
гьредаи бьбиньн кӧ һе кәсәк  
ле сийар нәбуйә. Әwe вәкьн  
у биньн. <sup>3</sup> У һәгәр йәк жь вә  
вьпьрсә у бежә: «Һун чьма ве  
йәке дькьн?» бежьне: «Хӧданр'а  
лазьм ә у we дәстхwәда быши-  
нә вьр»». <sup>4</sup> Әw шагьрт чун у ль  
бәр дәри ль к'уче, шә'шькәкә  
гьредаи дитьн. Гава вәдькь-  
рьн, <sup>5</sup> һьнәкед вьр сәкьни пьр-  
син: «Һун чь дькьн? Чьма we  
щә'шьке вәдькьн?» <sup>6</sup> Шагьрта  
щаба ван ӧса да, чава кӧ Иса  
ванр'а готьбу. У әw һьштьн.  
<sup>7</sup> Щә'шьк Исар'а анин, к'ьнщед

\* 10:46 Аһа жи те фә'мкьрьне: «Бар-Тимәйо», аһа готи «Кӧр'е-Тимәйо». «Бар» бь зьмане арами<sup>ф</sup> «кӧр'» ә.

хвә авитыңә сәр we у Әw ль we сийар бу. <sup>8</sup>Гәләка к'ынщед хвә сәр р'е р'адьхьстьн, һьнәка жи жь к'әwшен ч'ьрълед дара дьбьр'ин, сәр р'е р'адьхьстьн. <sup>9</sup>Йед ль пешийа Wi у пәй Wi кӧ дьчун дькьрьнә қир'ин: «Һосанна! Бьмбарәк ә Әwe кӧ бь наве Хӧдан те!» <sup>10</sup>Бьмбарәк ә әw П'адшатийа баве мә Да-wьдә кӧ те. Һосанна Йе Һәри Жорьнр'а!»

<sup>11</sup>Иса к'әтә Оршәлиме, чу п'арьстгәһе<sup>ф</sup>. Ч'ә'ве Хwә ль һәр тышти гәр'анд, ле чьмки иди евар бу, т'әви һәр донздәһа чу Бәйтанийае.

### Дара һежирейә һ'ышкбуйи

(Мәтта 21:18-19)

<sup>12</sup>Р'ожа дьне, гава әw жь Бәйтанийае дәрдык'әтын, Иса бьр'чи бу. <sup>13</sup>Дурва дарәкә һежирейә бәлгдайи<sup>ф</sup> дит, бәрбь we чу, к'а тыштәке сәр һәбә. Гава гьништә даре, пештьри бәлга тыштәк нәдит, чьмки һе нә wәхте һежира бу. <sup>14</sup>Һьнге Әwi we дарер'а

гот: «Бьра иди т'ӧ кәс т'ӧ шар бәре тә нәхwә». Шагьртед Wi әв готьн бьһистьн.

### Иса п'арьстгәһе пақьж дькә

(Мәтта 21:12-17; Луқа

19:45-48; Йуһ'әнна 2:13-22)

<sup>15</sup>У әw һатынә Оршәлиме. Иса к'әтә п'арьстгәһе у дәстпекьр әвед кӧ п'арьстгәһеда дьк'ьр'ин у дьфьротьн дәрхьстьнә дәрва. Т'әхтед п'әрәгӧһер'а у к'ӧрсийед кәвоткфьроша wәлгәр'андьн <sup>16</sup>у нәһьшт, кӧ т'ӧ кәс тыштәки п'арьстгәһер'а дәрбаз кә. <sup>17</sup>Әw һин кьрьн у гот: «Чьма нә ньвисар ә: «Мала Мьн we бона һ'әму мьләта мала дӧа бе һ'әсабе»\*? Ле wә әw кьрийә «шкәфта қачаха»\*\*». <sup>18</sup>Сәрәкед к'аһина у қанунзана әв йәк кӧ бьһистьн, дәстпекьрьн кӧ чава бькьн Wi бькьнә фәсале бькӧжьн. Әwana жь Wi дьтьрсийан, чьмки т'әмамия а'лаләте сәр һинкьрьна Wi зәндәгьрти мабу. <sup>19</sup>Гава кӧ р'о чу ава, Әw жь бажер дәрк'әтын.

\* 11:9-10 Зәбур 118:25-26; Луқа 1:32-33.

\* 11:10 Бь йунани хәбәр бь хәбәр аһа йә: «Һосанна бьльндайийеда». «Бьльндайи» бә'са щийе Хwәде дькә.

\* 11:17 Ишайа 56:7.

\*\* 11:17 Йерәмийа 7:11.

**Дәрса дара һежире**

(*Мәтта 21:20-22*)

<sup>20</sup> Сәре сьбәһе, гава әвана бәр дарер'а дәрбаз бун, дитын кө әв дара һежире р'аве хвәва һ'ышк буйә. <sup>21</sup> К'әтә бира Пәтрус у әви Исар'а гот: «Дәрсдар, дина Хвә бде, әв дара һежирейә кө Тә ньфьр' ле кьр һ'ышк буйә». <sup>22</sup> Иса ванр'а гот: «Бавәрийа вә бьра сәр Хвәде һәбә. <sup>23</sup> Әз р'аст вәр'а дьбежым, к'и кө ви ч'ийайир'а бежә: «Р'абә хвә бавежә бә'ре» у дөдьли нәбә, ле бавәр бькә кө готына ви ве бьқәшымә, өса жи ве бьбә. <sup>24</sup> Бона ве йәке Әз вәр'а дьбежым, һун чь кө нава дөада бьхвазьн, бавәр бькьн кө вә иди стандийә у хвәстьна вә ве бе сери. <sup>25</sup> У гава кө һун дьсәкьньн у дөа дькьн, бьбахшиньн, һәгәр тыштәки вә һьндава кәсәкида һәбә, вәки Баве вәйи ә'змана жи нәһәқийед вә бьбахшинә вә. <sup>26</sup> \* Ле һәгәр һун нәбахшиньн, Баве вәйи ә'змана жи нәһәқийед вә набахшинә вә».

**Пьрса дәрһәқа**

**һ'өкөме Исада**

(*Мәтта 21:23-27; Луқа 20:1-8*)

<sup>27</sup> У әв диса һатьнә Оршәлиме. Дәма кө Иса п'арьстгәһеда дьгәр'ийа, сәрәкед к'аһина, қанунзан у р'успи һатьнә шәм Ви <sup>28</sup> у же пьрсин: «Тө бь чь һ'өкөми ван кьра дьки? К'е әв һ'өкөм дайә Тә, кө Тө ван кьра бьки?» <sup>29</sup> Иса ванр'а гот: «Әзе жи тыштәки жь вә бьпьрсьм. Һәгәр вә шаба Мьн да, Әзе жи вәр'а бежым, кө Әз бь чь һ'өкөми ван кьра дькьм: <sup>30</sup> Һ'өкөме ньхөмандьна Йуһ'әнна жь ә'змен бу йан жь мәрьва? Шаба Мьн бьдьн!» <sup>31</sup> Әвана нав һәвда шешьрин у готын: «Һәгәр әм бежьн: «Жь ә'змен бу», Әве бежә: «Ле вә чьма әв бавәр нәкьр?» <sup>32</sup> Ле һәгәр әм бежьн: «Жь мәрьва бу?...» Әв жь ә'лаләте дьтьрсийан, чьмки һ'әмуя қәбул кьрьбу кө Йуһ'әнна р'аст п'ехәмбәр бу. <sup>33</sup> Шаба Иса дан у готын: «Әм ньзаньн». Иса ванр'а гот: «Әз жи вәр'а набежым кө Әз бь чь һ'өкөми ван кьра дькьм».

\* 11:26 Нав дәстньвисаред қөншда р'еза 26-а т'өнә.



**Мәсәлә р'әзе<sup>ф</sup> тьрийа  
у р'әзвана**

(*Мәтта 21:33-46; Луҗа 20:9-19*)

**12** <sup>1</sup> У бь мәсәлә дәст бь хәбәрдане кьр, ванр'а гот: «Мәрвьәки р'әзе<sup>ф</sup> тьрийа дани, дора we сур кьр, һ'әвзә-ки тьриһ'ьнщър'андьне теда к'ола, һеланәкә нобәдара чекьр у әв бь к'ьре да р'әзвана, чу вәлатәки дьн. <sup>2</sup> Вәхтда хөламәк шандә щәм р'әзвана, вәки жь wi р'әзи бәре п'ара хвә жь ван бьстинә. <sup>3</sup> Ле вана әв гьрт, к'өтан у дәствала вәр'екьрын. <sup>4</sup> У wi диса хөламәки дьн шандә щәм ван, ле вана сәри ле шкенанд у әв р'обәт кьрын. <sup>5</sup> Әви йәки дьн шанд, вана әв жи көшт. Wi гәләкед дьн шандьн, вана һьнәк жь ван к'өтан у һьнәк жи көштьн. <sup>6</sup> Бона wi т'әне йәк мабу кө бышанда, көр'е хвәйи дәлал. Хөләсә р'әбу әв жи шанд у гот: «Һьлбәт we жь көр'е мьн шәрм бькьн». <sup>7</sup> Ле әв р'әзванед һан ль һәв шешьрин у готьн: «Әв ware wi йә! Вәрьн әм ви бькөжьн, мират'е<sup>ф</sup> мәр'а

бьминә». <sup>8</sup> Ынге әв гьртьн көштьн у щьнйәзе wi жь р'әз дәрхьстьнә дәр. <sup>9</sup> Дә ижар хвәйе р'әз we чь бькә? Нә әве бе қыр'а р'әзвана бинә у р'әз бьдә һьнәкед дьн? <sup>10</sup> Чьма вә әв һьвисар нәхвәндийә?

«Әв кәвьре кө һоста т'әхсир кьр,

әв бу сәре ә'нишке<sup>ф</sup>.

**11** Әв йәк жь алийе Хөданда қөшьми

у ль бәр ч'ә'ве мә һ'әйр-һ'өж-мәк'ар ә!»\*

<sup>12</sup> Сәрверед щьһуйа<sup>ф</sup> фә'м кьрын, кө Иса әв мәсәлә ани сәр ван, кьрын кө Wi бьгьрын, ле жь ә'лаләте тьрсийан, к'әрба Әв һьштьн у чун.

**Пьрса хәрщдаин у  
нәдаийне**

(*Мәтта 22:15-22;*

*Луҗа 20:20-26*)

<sup>13</sup> Паше вана һьнәкә жь фьрсийа у пыштгьред һеродәс шандьнә щәм Wi, вәки Wi бь хәбәрәд дәве Wi бьгьрын.

<sup>14</sup> Әвана һатьн у жер'а готьн: «Дәрсдар! Әм заньн кө Тө йәки р'аст и. Мьнәте жь кәси наки, чьмки нав мәрвьада

\* <sup>12:11</sup> Зәбур 118:22-23.

фърдийе данайни, ле р'ийа Хвәде р'аст хин дьки. Гәло р'аст ә кө әм хәрщ бьднә Қәйсәр<sup>ф</sup> йан на? Әм бьднә, йан нәдн?»<sup>15</sup> Ле дөр'утиа ван кө Исава ә'йан бу гот: «Чьма хун Мьн дьщер'ьбинь? Мьнр'а зивәки биньн кө Әз бьбиньм». <sup>16</sup> Вана жер'а зивәк ани. Әви жь ван пьрси: «Әв наве ньвисар у сьфәт<sup>ф</sup> йе к'е йә?» Вана гот: «Йед Қәйсәр ьн». <sup>17</sup> Иса ванр'а гот: «Вәки өса йә, чь кө йед Қәйсәр ьн бьднә Қәйсәр у чь кө йед Хвәде нә бьднә Хвәде». У сәр Ви ә'щешмайи ман.

### Пьрса р'абуна мьрийа

(Мәтта 22:23-33;

Луқа 20:27-40)

<sup>18</sup> Садуқи<sup>ф</sup>, кө дьбежьн р'абуна мьрийа т'өнә, һнәкә жь ван һатьнә щәм Иса у же пьрсин: <sup>19</sup> «Дәрсдар! Муса мәр'а ньвисийә: «Һәгәр бьре йәки безөр'әт бьмьрә у жьне стухар бьһелә, бьра бьре ви жьна ви бьстинә у ware бьре хвә шин кә»\*. <sup>20</sup> Ава

һ'әфт бьра һәбун. Бьре мәзын жьнәкстанд, безөр'әт мьр. <sup>21</sup> Бьч'уке ви әв жьнстанд, әв жи безөр'әт мьр, өса жи һатә сәре йе сьсийа. <sup>22</sup> Хөләсә ван һәр һ'әфт бьра жи әв жьнстанд у безөр'әт мьрн, пәй ванр'а жи әв жьн мьр. <sup>23</sup> Дә ижар we Р'о-жа<sup>ф</sup> Р'абуне, гава мьри р'абьн, әва жьна we к'ижан бьрайир'а бьк'әвә? Чьмки һәр һ'әфта жи әва стандьбу».

<sup>24</sup> Иса ль ван вәгәр'анд у гот: «Нә хун жьдәст ве йәке хальфи нә, кө нә ньвисара заньн, нә жи қәвата Хвәде? <sup>25</sup> Гава йед мьри жь мьрне р'абьн, we нә бьзәвьщьн у нә жи мер кьн, чьмки әве мина мьлийак'әтед ә'змана бьн. <sup>26</sup> Ле дәрһәқа р'абуна мьрийада, чьма вә К'ьтеба Мусада\* нәхвәндийә сәрһатийа дара дьр'ийеда кө чава Хвәде Мусар'а дьбежә: «Әз Хвәдеие Бьраһим<sup>ф</sup>, Хвәдеие Ишақ<sup>ф</sup> у Хвәдеие Ақуб<sup>ф</sup> ьм»\*\*? <sup>27</sup> Әв нә Хвәдеие мьрийа йә, ле Хвәдеие зендийа йә. Хун лап хальфи нә!»

\* 12:19 Қануна Дөщари 25:5.

\* 12:26 «К'ьтеба Муса» те фә'мкьрне: «Һәр пенщ к'ьтебед пешьнә Пәймана<sup>ф</sup> Кәвьн».

\*\* 12:26 Дәрк'әтън 3:6.

**Т'эмийа сэр т'эмийар'а**

(*Матта 22:34-40;*

*Луқа 10:25-28)*

<sup>28</sup> Қанунзанәки кө шәр'-дә'wе ван бһист у дина хwә жи даие, кө Иса чава қәнш шаба ван да, незики Иса бу у же пьрси: «К'ижан т'эми сэр һ'эму т'эмийар'а йә?» <sup>29</sup> Иса ле вәгәр'анд: «Әв ә т'эмийа сэр т'эмийар'а: «Бьбьһе, Исраел! Хөдан Хwәдейе мә Хөданәк ә\*». <sup>30</sup> Хөдан Хwәдейе хwә һ'ыз бькә, бь т'эмамия дьле<sup>ф</sup> хwә, бь т'эмамия щанийа хwә, бь т'эмамия һ'ыше хwә у бь т'эмамия қәwата хwә\*». <sup>31</sup> Йа дөда жи әв ә: «Һәвалә хwә wәкә хwә һ'ыз бькә\*». Жь ван мәстър т'ө т'эми т'өнә». <sup>32</sup> Ижар қанунзан Вир'а гот: «Р'аст ә, Дәрсдар! Тә р'аст гот, кө «Хөдан йәк ә у жь Ви пештър йәки майин т'өнә\*». <sup>33</sup> У «бь т'эмамия дьл, бь т'эма-

мия қәwатә Хwәде һ'ызкьрһн у «Һәвалә хwә жи wәкә хwә һ'ызкьрһн» сәр һәр дийарий-ед<sup>ф</sup> т'эвайишәwатә у қөрбанед майинр'а йә\*». <sup>34</sup> Иса дина Хwә даие, кө ви бь ақьли шаба хwә да, жер'а гот: «Тө жь П'адшатиа Хwәде нә дур и». Пәй ве йәкер'а, иди т'ө кәси нәwерьбу тьштәк жь Ви бьпърсия.

**Мәсиһ көр'е к'е йә?**

(*Матта 22:41-46;*

*Луқа 20:41-44)*

<sup>35</sup> Гава кө Иса п'арьстгәһе-да һин дькьр, гот: «Қанунзан чава дьбежһн кө Мәсиһ көр'е Дауьд ә? <sup>36</sup> Нә Дауьд хwәха пе Р'өһ'е Пироз дьбежә?

«Хөдан готә Хөдане мьн:

Ль мьле Мьни р'асте р'уне, һ'әта кө Әз дьжмьнед Тә бькьмә бьне п'ийед Тә\*».

<sup>37</sup> Аwa Дауьд хwәха кө Ви «Хөдан» һ'әсаб дькә, иди Әw чава дьбә көр'е Дауьд?»

\* <sup>12:29</sup> Аһа жи те фә'мкьрһне: «Хөдан Хwәдейе мә, т'әне Әw ә Хөдан».

\* <sup>12:30</sup> Қануна Дөшари 6:4-5.

\* <sup>12:31</sup> Қануна К'аһинтийе 19:18.

\* <sup>12:32</sup> Қануна Дөшари 6:4; 4:35; Ишайа 45:21.

\* <sup>12:33</sup> Қануна Дөшари 6:5; Қануна К'аһинтийе 19:18; П'адшати I, 15:22; Носейа 6:6.

\* <sup>12:36</sup> Зәбур 110:1.

**Қанунзанед дөр’у***(Матта 23:1-36;**Луқа 20:45-47)*

We э’лалэта гъран бь дьл у эшқ гөһдарийа Иса дькър. <sup>38</sup> Ынкърьна Хвэда Эви гот: «Һ’эвза хвэ жь ван қанунзана бькьн, йед кө һ’ыз дькьн бь чөхед дьреж бьгэр’ьн, базарада сълаве бьднэ ван, <sup>39</sup> к’ьништада к’өрсийед пешьн бьгърьн у шайийада жи һэрэма<sup>ф</sup> жорьн р’унен. <sup>40</sup> Эвана аликива малед жьнэбийа һ’уфи хвэ дькьн, алийе дьнва жи бона хвэк’ьфшкърьне дөайе хвэ дьреж дькьн. Диwana wane he гъран бэ».

**Дийарийа жьнэбийа****бэлэнгаз***(Луқа 21:1-4)*

<sup>41</sup> Иса ль пешбэри п’эрэданга<sup>ф</sup> п’арьстгәһе р’унышт у дина Хвэ дайе, кө э’лалэте чава п’эрэ давитьнэ п’эрэданге. Гәлэк дәвләтийа гәлэк авитьне. <sup>42</sup> Жьнэбикә бэлэнгаз жи hat у дө пол<sup>ф</sup>, кө дькърә қөр’ушәк, авите. <sup>43</sup> Иса шагъртед Хвэ гази щәм Хвэ кърьн у ванр’а гот: «Эз р’аст вәр’а дьбежъм, кө әве жьнэбийа бэлэнгаз

жь ван һ’әмуяа зә’фтьр авитә п’эрэданге, <sup>44</sup> Ван һ’әмуяа жь зедәйа һәбука хвә авитьне. Ле әве ве бәлэнгазийа хвәда чи we һәбу кө пе ә’буре хвә бькьра һ’әму авите».

**Иса пешда дәрһәқа веранбуна п’арьстгәһеда дьбежә***(Матта 24:1-2; Луқа 21:5-6)*

**13** <sup>1</sup> Гава Иса жь п’арьстгәһе дәрк’әт, жь шагъртед Ви йәки Вир’а гот: «Дәрсдар! Һәла дина Хвә бьде әв чь кәввр ьн у чь авайи нә!» <sup>2</sup> Иса ль ви вәгәр’анд у готе: «Тө ван авайийед мәзын дьбини? Әв һ’әмуяе жи веран бьн, ль вьр кәвьре ль сәр кәвьр қәт нәминә!»

**Тәнгаси у зерандьн***(Матта 24:3-14; Луқа 21:7-19)*

<sup>3</sup> Гава Иса ль ч’ийайе Зәйт’уне, ль пешбэри п’арьстгәһе р’уныштьбу, Пәтрус, Ақуб, Йуһ’әнна у Әндрәвьс башқә же пьрсин: <sup>4</sup> «Бежә мә, әв тышт we к’әнге бьқәшьмьн? У бәри қәшьмандьна ван һ’әмуяа, чь нишане бьбьн?» <sup>5</sup> Һьнге Иса дәстпекър у ванр’а гот: «Һаш жь хвә һәбьн, кө т’ө кәс wә нәхапинә. <sup>6</sup> Гәлэк we пе наве Мын

бен у бежын: «Эз ым Мәсиһ» у we гәләка бьхальфиньн. <sup>7</sup> Гава хун дәнге шәр’а у бә’са шәр’а бьбьһен, хун хвә онда нәкьн. Гәрәке әв тышт бьрәвьмьн, ле әв һе нә ахьри йә. <sup>8</sup> Мьләте р’а-бә сәр мьләт, п’адшатийе р’абә сәр п’адшатийе, ши-шийа we әрдһ’әжу хәлайи-шәлайе бьбьн. Ле әв һ’әму мина еша к’өлфәте йә, кә дәстпедькә пе дьгьрә.

<sup>9</sup> Ле хун һаш жь хвә һәбьн! We вә бьбьнә бәр диwana у к’ьништада вә бьк’өтьн. Бона Мьн we вә бәр вәли<sup>ф</sup> у п’адша бьдьнә сәкьнандьне, вәки хун бәр ван шә’дәтийе бьдьн. <sup>10</sup> Гәрәке пешийе Мьзгини һ’әму мьләтар’а бе дайине. <sup>11</sup> Гава кә вә бьгьрьн бьбьнә бәр диwane, пешда хәм нәкьн кә һуне чь бежын. Ле we дәме чь вәр’а бе дайине, we жи бежын, чьмки нә кә һуне хәбәр дьн, ле Р’өһ’е Пироз. <sup>12</sup> Бьра we бьре хвә бьдә кәштьне у бав кәр’е хвә. Зар’е р’абьнә сәр де у баве хвә у ван бьдьнә кәштьне. <sup>13</sup> У бона наве Мьн һуне бәр ч’ә’ве һ’әмуя р’әш бьн. Ле әве кә һ’әта хьлазийе тәйах кә, әве хьлаз бә.

## Һ’әрабийа Веранкьрьне

(Мәтта 24:15-21;

Лука 21:20-24)

<sup>14</sup> Ава чахе хун we «Һ’әрабийа веранкьрьне»\* бьбиньн, ль ши щийе нәщайиз сәкьни», (әве кә дьхунә бьра фә’м бькә) «һьнге әвед кә Щьһустанеда нә бьра бьр’әвьнә ч’ийа. <sup>15</sup> У әве кә сәр хани йә бьра жорда нәйе хваре у нәк’әвә һьндөр’, вәки тыштәки һьлдә. <sup>16</sup> У әве кә к’әвшенда йә бьра вәнәгәр’ә кә п’өте хвә һьлдә. <sup>17</sup> Ле вәй ль һ’әмла у дәстдәргуша ван р’ожада! <sup>18</sup> Дәа бькьн кә әв йәк зьвьстанеда нәрәвьмә. <sup>19</sup> Чьмки ван р’ожада we тәнгасикә өса бьбә, вәки жь р’ожа кә Хвәде дьнйа ә’фьрандийә һ’әта ньһа нәбуяә у нә жи we бьбә. <sup>20</sup> Һәгәр Хөдан әв р’ож кьн нәкьрьна, т’ө кәс хьлаз нәдьбу, ле бона хатьре ван бьжартийед кә Ви бьжартьнә, әв р’ож кьн кьрьнә.

<sup>21</sup> Һьнге, һәгәр йәк вәр’а бежә: «Мәсиһ ва йә ль вьр ә», йан жи: «Ва йә дәра һан ә», бавәр нәкьн. <sup>22</sup> Чьмки мәсиһ у п’ехәмбәред дәрәw we дәрән. We нишан у к’әрәмәта бькьн,

\* <sup>13:14</sup> Данийел 9:27; 11:31; 12:11.

һәгәр дәст ванва бе, we бьжар-  
тийа жи бьхальфиньн. <sup>23</sup>Ле һун  
һаш жь хвә һәбьн! Мьн һәр  
тышт пешда вәр'а гот.

### Һатъна Көр'е Мервь

(Матта 24:29-31;

Луца 21:25-28)

<sup>24</sup> Ле ван р'ожада, пәй we  
тәнгасийер'а,

р'уйе р'ойе we бе гьртъне  
у һиве р'онайа хвә нәдә,

<sup>25</sup> стәйрке жь ә'змен бьк'әвьн,  
у т'опед ә'змана we жь р'ийед  
хвә дәрән\*<sup>\*\*</sup>.

<sup>26</sup> У һьнге we бьбиньн, Кө-  
р'е Мервь бь қәвата мәзын у  
р'умәт ә'врава те\*. <sup>27</sup>Ви чахи  
Әве мьляк'әтед Хвә бышинә  
у бьжартийед Хвә жь һәр чар  
қолба бәрәв кә, жь п'әр'ед ә'р-  
де гьрти һ'әта п'әр'ед ә'змен.

### Дәрса дара һежире

(Матта 24:32-35;

Луца 21:29-33)

<sup>28</sup> Жь дара һежире дәрсәке  
һин бьн: Чахе кә ч'ьрәлед we  
тәр' дьбьн у бәлгед we дьбьш-

кьвьн, иди һун заньн кә һавин  
незик ә. <sup>29</sup>Оса жи гава һун  
бьбиньн кә әв йәк дьқәвьмьн,  
бьзаньбьн кә Әw незик ә, ль  
бәр шемике йә. <sup>30</sup>Әз р'аст вә-  
р'а дьбежьм, әва ньсыла дәрбаз  
набә, һ'әта кә әв һ'әму тышт  
нәдәвьмьн. <sup>31</sup>Ә'рд у ә'змәне  
дәрбаз бьн, ле готънед Мьн т'ө  
щар дәрбаз набьн.

### Р'ож у сьһ'әт нә ә'йан ә

(Матта 24:36-44)

<sup>32</sup> Ле бона we р'оже у we сьһ'әте  
т'ө кәс ньзанә, нә мьляк'әтед  
ә'змен у нә жи Көр', ле т'әне Бав.

<sup>33</sup> Һаш жь хвә һәбьн! Һ'ышйар  
бьминьн!\* Чьмки һун ньзаньн  
к'әнге вәхте пер'а бьгьһижә.

<sup>34</sup> Әв йәк мина мәрвьәки йә, кә  
мала хвә дьһелә у дәрдьк'әвә  
р'ешитийе. Бәри чуйине т'ә-  
мийа мала хвә дьдә хөламед  
хвә, шьхөле ван һәр кәси дьде  
у ә'мьри сәр дәргәһван дькә,  
кә һ'ышйар бьминә. <sup>35</sup> Бона ве  
йәке һ'ышйар бьминьн, чьмки  
һун ньзаньн малхе мале we  
к'әнге бе, еваре йан ниве шә-

\* 13:25 Аһа жи те фә'мкьрьне: «Қәватед ә'змана we бьһ'әжьн».

\*\* 13:25 Ишайа 13:10; 34:4; Йоел 2:10, 31; 3:15.

\* 13:26 Данийел 7:13. (Бьхуньн: Ә'йанти 1:7.)

\* 13:33 Нав һьнәк дәстньвисарада әв жи һәйә: «У дәа бькьн».

ве, йан вәхте бангдана дика, быгьрә. <sup>37</sup>Эз чь вәр'а дьбежым, йан сәре сьбәһе. <sup>36</sup>Нәбә кә һ'әмуяр'а дьбежым: һ'ышйар нышкева Әw бе у вә хәведа бьминьн!»

## Гьртын, хачкьрын<sup>ф</sup> у р'абуна Иса

### Шевьра кәштна Иса

(Мәтта 26:1-5; Луқа 22:1-2;

Йуһ'әнна 11:45-53)

**14** <sup>1</sup>Ава дө р'ож шунда we Щәжьна<sup>ф</sup> Дәрбазбуне у Щәжьна<sup>ф</sup> Нане Шкәва бьбуя. Сәрәкед к'аһина у қанунзана мәшаләке дьгәр'ийан, кә ча-ва Иса дьзива бь фелбазийе быгьрын, бькөжын <sup>2</sup>у дьготын: «Бра әв йәк щәжьнеда нибә, вәки щьмәт'р'анәбә сәр ньга».

### Иса Бәйтанияеда

те р'ункьрне<sup>ф</sup>

(Мәтта 26:6-13;

Йуһ'әнна 12:1-8)

<sup>3</sup>Гава Иса ль Бәйтанияе мала Шьмһ'уне к'отида, ль сәр сьфре р'уньшти бу, к'өл-фәтәк һат, дәрданәкә<sup>ф</sup> вейә алабастьрейи р'уне нардейи<sup>ф</sup> сафи у гәләки бьһа һәбу. We әw шушә шкенанд у әw р'ун р'етә сәр сәре Иса.

<sup>4</sup>Һнәкә вьр һерс к'әтын у һәвр'а дьготын: «Һ'әйфа ви р'у-

ни! Чьма әва зийана бу? <sup>5</sup>Мә дькарьбу әв р'уна сесьд зиви зедәтьр бьфьрота у бәлайи фәқида кьра». Бь ви авайи әw к'өлфәта р'әзил кьрын.

<sup>6</sup>Ле Иса гот: «Жь we к'өлфәте вәгәр'ьн! Чьма һун хатьре we дьк'әвьн? Әwe тыштәки қәнщ бона Мьн кьр. <sup>7</sup>Фәқире һәр гав т'әви вә бьн. К'әнге һун бьхвазьн, һун дькарьн қәнщи-йе ванр'а бькьн. Ле Әзе һәр гав нав вәда нибьм. <sup>8</sup>Чь жь дәсте we дьһат әwe кьр. Әwe пешда бәдәна Мьн дәфьнкь-рьнер'а<sup>ф</sup> р'ун<sup>ф</sup> кьр. <sup>9</sup>Эз р'аст вәр'а дьбежым, дьняйеда к'идәре әва Мьзгинийа бе даннасинкьрне, we кьрна ве к'өлфәте жи бона биранина we бе готьне».

### Щьһуда нәмамия<sup>ф</sup>

Иса дькә

(Мәтта 26:14-16; Луқа 22:3-6)

<sup>10</sup>Һьнге Щьһудайе Исхәрийо-ти, йәки жь һәр донздәһа, чу щәм сәрәкед к'аһина, вәки Иса

бьдә дәсте ван. <sup>11</sup> Ван жи гава эв йәк бьхист, ша бун у п'эрә wir'а соз дан. У Щьһуда жь һынгева мәшаләке дьгәр'ийа кӧ чава Иса бьдә дәсте ван.

**Иса т'эви шагьрта шива  
Щәжьна Дәрбазбуне дьхвә**  
(*Мәтта 26:17-25; Луқа 22:7-14,  
21-23; Йуһ'әнна 13:21-30*)

<sup>12</sup> Р'ожа пешьнә Щәжьна Нане Шкәвада кӧ бәрхе қӧрбана Щәжьна Дәрбазбуне дьһатә сәржекьрьне, шагьрта жь Иса пьрси: «Тӧ ль к'ӧ дьхвази Шива Щәжьна Дәрбазбуне бьхви, вәки әм һәр'ьн тәр'а һазьр кьн?» <sup>13</sup> Иса дӧ шагьртед Хвә шандьн у ванр'а гот: «Һәр'ьнә бажер. Мәрвьәке р'асти вә бе, шер'е аве ль сәр мьла. Пәй ви һәр'ьнә we мала кӧ әв дьче <sup>14</sup> у бежьнә хвәйе мале: <Дәрсдар дьбежә: К'ане әв ода мевана, йа кӧ Әзе теда т'эви шагьртед Хвә шива Щәжьна Дәрбазбуне бьхвьм?» <sup>15</sup> Ынге әве ль қате жорьн одәкә мәзьнә һәвдаи у һазьр нишани вә кә, ль we дәре шиве бона мә һазьр кьн». <sup>16</sup> Шагьрта да сәр р'е чунә бажер у чава кӧ ванар'а готьбу

ӧса жи дитьн у шива Щәжьна Дәрбазбуне һазьр кьрьн.

<sup>17</sup> Гава р'о чу ава, Иса т'эви һәр донздәһа чу we дәре. <sup>18</sup> Чахе ль сәр сьфре р'уньштьн у нане хвә дьхварьн, Иса гот: «Әз р'аст вәр'а дьбежьм, йәки жь вә we нәмамийа<sup>ф</sup> Мьн бькә, йе кӧ т'эви Мьн нен дьхвә». <sup>19</sup> Әв бәр хвә к'әтьн у дәстпекьрьн йәк-йәк жь Ви пьрсин: «Дьбә кӧ әз ьм?» <sup>20</sup> Әви ванр'а гот: «Әв йәк нава вә һәр донздәһа да йә, йе кӧ пә'рийе хвә т'эви Мьн т'аседа дькә. <sup>21</sup> Р'аст Кӧр'е Мервь we ӧса һәр'ә чава кӧ бона Ви һатийә ньвисаре. Ле вәй ль ви мәрьве кӧ нәмамийа Кӧр'е Мервь бькә! Wir'а he қәнщ бу кӧ әв қәт дьне нәк'әта».

### Шива Хӧдан

(*Мәтта 26:26-30; Луқа 22:14-23;  
Корьнт'и I, 11:23-25*)

<sup>22</sup> Гава вана һе нан дьхвар, Иса нан һьлда шькьри да, кәркьр да шагьрта у гот: «Һан һьлдьн! Әва бәдәна Мьн ә». <sup>23</sup> Пәйр'а к'ас һьлда шькьри да у да ван. Ы'әмуяа жи жь we вәхвар. <sup>24</sup> У ванр'а гот: «Әва хуна Мьн ә бона пәймане<sup>ф\*</sup>,

\* <sup>14:24</sup> Нав һьнәк дәстньвисарада «пәймана ну» һәйә.



кӧ бона гэлэка те р'етьне. <sup>25</sup>Эз р'аст вэр'а дыбежым, иди Эз жь вьр шунда т'ӧ шар жь мѣя ть-рийе вѣнахвѣм, х'ѣта we р'ожа кӧ Эзе П'адшатийа Хвѣдеда жь йа ну вѣхвѣм».

<sup>26</sup> Паше вана зѣбурѣк<sup>ф</sup> сть-ра, дѣрк'ѣтын чунѣ ч'ийайе Зѣйт'уне.

**Иса дѣрхѣца инк'арийа  
Пѣтруста дыбежѣ**

*(Мѣтта 26:31-35; Лука  
22:31-34; Йух'ѣнна 13:36-38)*

<sup>27</sup> У Иса ванр'а гот: «Хун х'ѣмуйе жи жь Мьн п'ышк бьн хѣр'ьн, чьмки ньвисар ѣ:

«Эзе ль шьвен хьм у пѣзе жи бѣла-бѣлайи бѣ»\*.

<sup>28</sup> Ле гава кӧ Эз жь мьрьне р'абьм, Эзе бѣри вѣ хѣр'ьмѣ Шѣлиле». <sup>29</sup> Пѣтруст жер'а гот: «Хѣгѣр х'ѣму жи жь Тѣ п'ышк бьн хѣр'ьн, ле ѣз на».

<sup>30</sup> Иса вир'а гот: «Эз р'аст тѣр'а дыбежым, хѣма ишѣв хѣ бѣри кӧ дик дӧ шара банг дѣ, те се шара Мьн инк'ар ки». <sup>31</sup> Ле Пѣтруст сѣр йа хвѣ дьма удьгот: «Хѣгѣр ши бе, ѣзе т'ѣви Тѣ бь-мьрьм жи, ле т'ӧ шар Тѣ инк'ар накьм!» Х'ѣмуйа жи аха дьгот.

**Иса ль Гѣтшѣманийе  
дӧа дькѣ**

*(Мѣтта 26:36-46;  
Лука 22:39-46)*

<sup>32</sup> Пѣй we йѣкер'а ѣв чунѣ ви щийе кӧ жер'а Гѣтшѣмани дыбежьн у ѣви шагьртед Хвѣ-р'а гот: «Вьра р'унен, х'ѣта кӧ Эз дӧа бькьм». <sup>33</sup> Ви Пѣтруст, Аруб у Йух'ѣнна т'ѣви Хвѣ бьрьн у дѣстпекьр к'ѣсѣр к'ь-шанд у Хвѣда шѣвьги. <sup>34</sup> Ви ванр'а гот: «Дьле Мьн хаѣас дѣрд у к'ѣдѣр ѣ, мина бѣр мь-рьне. Вьра бьминьн у х'ьшйар бьн». <sup>35</sup> Хьнѣки пешда чу, Хвѣ дѣвѣр'у авитѣ ѣрде у дӧа кьр, кӧ хѣгѣр мѣшал хѣбѣ, ѣва сь-х'ѣта сѣр Вир'а дѣрбаз бѣ. <sup>36</sup> У гот: «Абба<sup>ф</sup>, Баво! Хѣр мѣшал жь дѣсте Тѣ те. ѣве к'ѣсе жь Мьн дур хѣ. Ле бьра хвѣстьна Мьн нибѣ, ле йа Тѣ бѣ».

<sup>37</sup> Паше хатѣ щѣм шагьрта, ѣв р'азайи дитьн у готѣ Пѣтруст: «Шьмх'ун, тӧ р'азайи? Тѣ нь-карьбу кӧ сьх'ѣтѣке тӧ х'ьшйар бьмайи? <sup>38</sup> Х'ьшйар бьминьн у дӧа бькьн, вѣки хун нѣк'ѣвьнѣ нава шер'ьбандьне. Бѣле р'ӧх' р'азии йѣ, ле бѣдѣн сьст ѣ».

\* <sup>14:27</sup> Зѣкѣрийа 13:7.

<sup>39</sup> Диса чу дӱа кър, хут эв хэбэр готын. <sup>40</sup> У хат диса эв хэведа дитын, чъмки ч'э'вед ван жь хэве вэнэдьбун. У нъзаньбун чь шаба Ви бьдана. <sup>41</sup> Щара сьсийа жи хат у ванр'а гот: «Һун һэла һе р'азайи нэ у р'һ'эт дьбьн? Бэс э! Вэхт пер'а гьһишт. Ва йэ Кӱр'е Мерьв дьк'эвэ дэсте гӱнэк'ара. <sup>42</sup> Р'абьн эм һэр'ьн. Ва йэ эве кӱ нэмамия Мьн дькэ незик бу».

### Гьртъна Иса

(*Матта 26:47-56; Луца 22:47-53; Йуһ'анна 18:3-12*)

<sup>43</sup> Һэма һьнге гава Ви һе хэбэр дьда, Щьһудайе кӱ йэк жь һэр донздӱһа бу, хат. Эви т'эви хвэ жь алийе сэрэкед к'аһина, қанунзана у р'успийада э'лалэтэкэ гьран анибу, бь дара у шура. <sup>44</sup> Ава нэмаме Ви э'шэрэт дабу ван у готьбу: «Эз к'ижани кӱ р'амусьм, Эв э, Ви бьгьрын у бь фэсал бьбьн». <sup>45</sup> Һэма һьнге жи Щьһуда хатэ щэм Иса у гот: «Дэрсдар!» у р'амуса. <sup>46</sup> Вана дэст авитэ Иса у Эв гьртын. <sup>47</sup> Ле йэки жь

йед кӱ т'эви Ви сэкьни бун, шуре хвэ к'ьшанд ль хӱламе сэрэкк'аһин хьст у гӱһе ви пэканд. <sup>48</sup> Һьнге Иса ванр'а гот: «Те бежи вэ сэр қачахэкида гьртийэ, кӱ һун бь дара у шура хатьнэ Мьн бьгьрын? <sup>49</sup> Нэ Эз һэр р'ож т'эви вэ п'арьстгәһеда бум Мьн һун һин дькьрын, ле вэ Эз нэдьгьртъм. Ле бона кӱ ньвисар бенэ сери, эв йэк қәвьми». <sup>50</sup> Һьнге һ'эму шагьрта Эв һьшт у р'эвин. <sup>51</sup> Хортэк пәй Ви дьчу, п'арч'эки к'ьтане ль бәдәна вийэ тә'зи п'еч'айи бу. Э'лаләте эв гьрт, <sup>52</sup> ле ви эв к'ьтан һьшт у р'ут-тә'зи жь дэсте ван р'эви.

### Иса ль бэр щьвина<sup>Ф</sup> гьрэгьра

(*Матта 26:57-68; Луца 22:54-55, 63-71; Йуһ'анна 18:13-14, 19-24*)

<sup>53</sup> Иса бьрынэ щэм сэрэкк'аһин. Һ'эму сэрэкед к'аһина, р'успи у қанунзан вьр щьвийан. <sup>54</sup> Пәтрис дурва п'е-п'е пәй Ви чу, һ'эта к'этэ һ'эвша сэрэкк'аһин. Вьр т'эви нобәдара ль бэр егьр р'унышт

\* <sup>14:45</sup> Бь йунани хэбэр бь хэбэр аһа йэ: «Р'абби». «Р'абби» бь зьмане арами те фә'мкьрне: «Дэрсдар».

у хвә гәрм дькър. <sup>55</sup> Сәрәкед к'аһина у т'эмамия шьвина<sup>ф</sup> гьрәгьра жи ль шә'дәтикә мь-қабьли Иса дьгәр'ийан, вәки Ви бькөжьн, ле нә дьдитьн. <sup>56</sup> Гәләка мьқабьли Ви шә'дә-тия дәрәш дьда, ле шә'дәтия ван һәвдө нәдьгьрт. <sup>57</sup> Ынге һьнәк р'абун у мьқабьли Ви шә'дәтия дәрәш дан у готьн: <sup>58</sup> «Мә бьһист кә Ви мәрви гот: «Әзе ве п'арьстгәһа кә бь дәста һатийә чекьрне һьлшиньм у се р'ожада п'арьстгәһәкә дьнә бе дәстлек'әтьн чекьм». <sup>59</sup> Ле шә'дәтия ван жи һәвдө нә-дьгьрт. <sup>60</sup> Ынге сәрәкк'аһин р'абун нава ванда сәкьни у жь Иса пьрси: «Бона ван шә'дә-тия кә әвана мьқабьли Тә дьдьн Тө чьма шабәке нади?» <sup>61</sup> Ле Әви дәнге Хвә нәкър у т'ө шаб нәда. Сәрәкк'аһин<sup>ф</sup> диса жь Ви пьрси у готе: «Тө йи Мәсиһ, Көр'е Йе һежайи шькьрийе?» <sup>62</sup> Иса готе: «Әз ьм. У һуне Көр'е Мерьв ль к'еләка<sup>ф</sup> Йе һәри Зор, ль мьле вийи р'асте р'уньшти у ль сәр ә'врәд ә'змен те бьбиньн\*». <sup>63</sup> Ынге сәрәкк'аһин к'ьнщәд хвә қәлаштьн у гот: «Иди шә'дә

чи мәр'а нә? <sup>64</sup> Вә бьһист Әви чава Хвәде бәһөрмәт кьр! Вәва чава хөйа дьбә?» <sup>65</sup> Ынгу муйа жи Әв нәһәқ кьрьн готьн, кә Әв йе кәштьне йә. <sup>65</sup> Ынге һьнә-ка дәстпекьр т'уйи Ви кьрьн, р'уйе Ви ньхамтьн, данә бәр к'өлма у жер'а готьн: «Дә п'е-хәмбәртие бькә!» Нобәдара жи Әв бьр у данә бәр шәмақа.

### Пәтрус Иса инк'ар дькә

*(Мәтта 26:69-75;*

*Луқа 22:56-62;*

*Йуһ'әнна 18:15-18, 25-27)*

<sup>66</sup> Гава Пәтрус ль жере һ'әш-шеда бу, жь шарийед сәрәкк'а-һин йәк һатә вьр. <sup>67</sup> Әве кә дит Пәтрус хвә ль бәр егьр гәрм дькә, ль ви ньһер'и у гот: «Тө жи т'әви әви ньсрәти<sup>ф</sup> буйи, т'әви Иса». <sup>68</sup> Ле әви инк'ар кьр у гот: «Әз ньзаньм у фә'м накьм кә тө чь дьбежи». Әв жь һ'әшше дәрк'әт чу сьвдәра ль бәр дәргәһ, дик банг да. <sup>69</sup> Гава кә шарийе әв ль ве дәре дит, диса готә йед дор-бәра сәкь-ни бун: «Әва жи йәки жь ван ә». <sup>70</sup> Ле әви диса инк'ар кьр. У хеләке шунда, йед кә вьр сәкьни бун, диса Пәтруср'а

\* <sup>14:62</sup> Зәбур 110:1; Данийел 7:13.

готын: «Һәбә-т'өнәбә тө жи жь ван и, чьмки тө жь Щә-лиле йи у хәбәр дана тә жи тә дьфьрошә\*». <sup>71</sup> Ле Пәтрус дәст бь ньфьр'а кьр, сонд хвар у гот: «Әз Ви мәрвьи нас накьм, бона к'ижани һун дьбежьн». <sup>72</sup> Пер'а-пер'а дик шара дөда банг да. У Пәтрус әв готьна Иса кө wir'а готьбу ани бира хвә: «Бәри кө дик дө шара банг дә, те се шара Мьн инк'ар ки». Ль сәр ве йәке дәстпекьр гьрийа.

**Иса ль бәр Пилато<sup>Ф</sup>**

(*Мәтта 27:1-2, 11-14;*

*Луқа 23:1-5;*

*Йуһ'әнна 18:28-38)*

**15** <sup>1</sup>Сәре сьбәһе зу сәрәкед к'аһина т'әви р'успийа, қанунзана у т'әмамийа шьвинна гьрәгьрар'а шевьрин. Иса гьредан у бьрьн данә дәсте Пилато<sup>Ф</sup>. <sup>2</sup> Пилато жь Ви пьрси у гот: «Тө йи П'адше шьһуйа?» Әви шаб да у гот: «Тә бь дөве хвә гот». <sup>3</sup> Ынге сәрәкед к'аһина гәләк тыштада авитьнә Ви. <sup>4</sup> Пилато диса жь Ви пьрси у гот: «Тө қәт шабәке нади? Дина Хвә бьде, кө

чьқаси давежьнә Тә!» <sup>5</sup> Ле Иса иди т'ө шаб нәда ви, һ'әта кө Пилато шаш ма.

**Диванеда һ'өкөме көштьне  
ль сәр Иса дәрдьхьн**

(*Мәтта 27:15-26;*

*Луқа 23:13-25;*

*Йуһ'әнна 18:39–19:16)*

<sup>6</sup> Ава һәр Щәжьна Дәрбазбунеда әдәте вәли бу, кө гьртики шьмә'тер'а бәр'дә, к'ижан кө ван бьхвәста. <sup>7</sup> Гьртик кәледа һәбу наве ви Барабас, кө т'әви р'абәрик'аред һәвалед хвә сәрһьлданеда мер көштьбун. <sup>8</sup> Ә'лаләт шьвийа у жь вәли хвәст кө әв ль анәгори ви әдәте хвә хвәстьна ван бькә. <sup>9</sup> Пилато жи ванр'а гот: «Һун дьхвазьн вәки әз бона вә П'адше шьһуйа бәр'дьм?» <sup>10</sup> Әви заньбу кө сәрәкед к'аһина жь дәст һ'әвсудийе Иса дабунә дәсте ви. <sup>11</sup> Ле сәрәкед к'аһина һе нав ә'лаләте дан, кө бьхвазьн вәки Барабас бона ван бе бәр'дане. <sup>12</sup> Пилато диса жь ван пьрси у гот: «Ле әз иди Әви чава бькьм, йе кө һун жер'а П'адше шь-

\* 14:70 Нав дәстньвисаред һәрә қәншда әв йәк т'өнә: «У хәбәр дана тә жи тә дьфьрошә».

хуйа дьбежын?»<sup>13</sup> Вана кърэ қир'ин у готын: «**Ви хач<sup>ф</sup> кә!**»<sup>14</sup> Пилато ванр'а гот: «**Чьма? Эви чь хьраби кьрийә?**» Ле вана не дькърэ қир'ин: «**Ви хач кә!**»<sup>15</sup> Пилато хвәст кӧ ә'лаләт р'ази кьра, Барабас бона ван бәр'да. У Иса да бәр қамчийа у да дәсте ван, вәки бе хачкьрыне.

**Әскәр қәрфе хвә  
ль Иса дькын**

*(Мәтта 27:27-30;  
Йуһ'әнна 19:2-3)*

<sup>16</sup> Ынге әскәра Әв бьрә һын-дӧр'е сәрайе, аҗа готи һ'әвшә қәсьра вәли у һ'әму р'әфа әскәра ль сәр щьвандын.<sup>17</sup> Чӧ-хәки ширк<sup>ф</sup> ле кьрын у т'ашәк жь стьрийа вәгьрти данә сери.<sup>18</sup> Дәстпекьрын сылав дане у готын: «Хвәш бә П'адше щь-хуйа!»<sup>19</sup> Пе қамиш<sup>ф</sup> ль сәре Ви дьхьстьн, т'уйи Ви дькьрын у ль сәр чокаль бәр Ви та дьбун.<sup>20</sup> Ле пәй қәрфкьрьнер'а, әв чӧхе ширк же ехьстьн, к'ьнщед Ви ле кьрын у бьрынә дәрва кӧ Ви хач кьн.

**Хачкьрына Иса**

*(Мәтта 27:32-44; Луқа  
23:26-43; Йуһ'әнна 19:17-27)*

<sup>21</sup> Шьмһ'уне жь Курене, баве Скәндәр у Р'уфо вьрр'а дәрбаз дьбу, кӧ жь к'әвшен дьһат. Әскәра п'ейи сәр ви кьрын кӧ хаче Иса һьлдә.<sup>22</sup> Иса бьрынә ви щийе кӧ жер'а Голгота дь-готын, кӧ те фә'мкьрыне: «Щи-йе Қафа».<sup>23</sup> Шәрава зьмьр<sup>ф</sup>\* т'әвкьри дане кӧ вәхвә, ле Ви вәнәхвар.<sup>24</sup> Әв хач кьрын, сәр к'ьнщед Ви п'әшк авитьн, к'а к'ер'а ве чь бьк'әвә, нава хвәда бәла кьрын\*.<sup>25</sup> У сьбәһе сьһ'әт нәһә бу, гава Әв хач кьрын.<sup>26</sup> Ньвисара нәһәқийа Ви аһа ньвисар бу: «П'АД-ШЕ ЩЬҺУЙА».<sup>27</sup> Т'әви Ви дӧ қачах жи хач кьрын, йәк ль мьле Вийи р'асте, йе дьн ль мьле Вийи ч'әпе.<sup>28</sup> Бь ви аҗайи әв ньвисар һатә сери, йа кӧ дьбежә: «Әв т'әви зӧлмк'ара һатә һ'әсабе»\*.<sup>29</sup> У әвед кӧ вьрр'а дьчун-дьһатьн, әв бәһӧрмәт дькьрын, сәре хвә дьһ'әжандын у дьготьне:

\*<sup>15:23</sup> Ынге «зьмьр» бәр ешева дьданә нәхвәш.

\*<sup>15:24</sup> Зәбур 22:18.

\*<sup>15:28</sup> Нав дәстньвисаред һәрә қәнщда р'еза 28-а т'ӧнә.

«Ҳейи! Нә Тәйе п'арьстгәһ һылшанда у се р'ожада чекъра, <sup>30</sup>дә Хвә хылаз кә, жь хач вәрә хваре!» <sup>31</sup>Ӧса жи сәрәкед к'аһина т'әви қанунзана нав хвәда қәрфе хвә ле дыкьрын удыготьн: «Хәлқ хылаз кьр, ле Хвә нькарә хылаз кә! <sup>32</sup>Дә бьраньһа Мәсиһ, П'адше Исраеле жь хаче бе хваре, вәки әм бьбиньн у бавәр бькьн». Йед т'әви Ви һатьбунә хачкьрьне жи тә'н ль Ви дьхьстьн.

### Мьрьна Иса

(*Матта 27:45-56; Луқа 23:44-49; Йух'әнна 19:28-30*)

<sup>33</sup>Нивро жь сьһ'әта донз-дәһа һ'әта сьһ'әта сьсийа, т'әмамия а'рде бу тә'ри. <sup>34</sup>У сьһ'әта сьсийа Иса бь дәнгәки бьльнд кьрә қир'ин у гот: «Елойи, Елойи, лама сабахтани?» кә те фә'мкьрьне: «Хвәдейе Мьн, Хвәдейе Мьн, Тә чьма Ӧз һьштьм?»\*

<sup>35</sup>Әве кә незик сәкьнибун, гава әв хәбәр бьһистьн, готьн: «Бьньһер'ьн, Әв гази Елйас дыкә». <sup>36</sup>Жь ван йәк бәзи, луфька<sup>ф</sup> бә'ре һьлда сьркеда

кьр, қамишәкива дани у дырежи Ви кьр, кә вәхвә у гот: «Бьсәкьньн. Әм бьбиньн к'а Елйасе бе Ви бинә хваре».

<sup>37</sup>Иса бь дәнгәки бьльнд кьрә қир'ин у р'өһ'е Хвә да. <sup>38</sup>Ви чахи п'әр'да п'арьстгәһе жь сери һ'әта бьни қәльши, бу дө тиша<sup>ф</sup>. <sup>39</sup>Сәрсәде кә ль пешбәри Иса сәкьни бу, гава дит кә Иса чава р'өһ'е Хвә да\*, гот: «Р'әсти жи әва Мәрьва Көр'е Хвәде бу!» <sup>40</sup>Ль we дәре к'өлфәт жи һәбун, кә дурва ль ве йәке дьньһер'ин. Мәрийәма Мәждәлани, Мәрийәма дийа һәр дө бьра, Ақубе бьч'ук у Йусес у ӧса жи Сәлома нав ванда бун. <sup>41</sup>Әвана һьнге, гава Иса ль Щәлиле бу, пәй Ви дьчун у жер'а хьзмәтк'ари дыкьрын. Пештьри ван, гәләк к'өлфәтед дьн жи ьр һәбун, кә т'әви Иса һатьбунә Оршәлиме.

### Дәфьнкьрьна Иса

(*Матта 27:57-61; Луқа 23:50-56; Йух'әнна 19:38-42*)

<sup>42</sup>Әв йәк р'ожа<sup>ф</sup> т'ьвдарәкьрьне бу, ава готи р'ожа бәри

\* 15:34 Зәбур 22:1.

\* 15:39 Нав һьнәк дәстньвисарада аһа йә: «кьрә қар'ин у р'өһ'е Хвә да».

шәмийе. Бәре еваре <sup>43</sup>Усьве<sup>ф</sup> Аримәтйайи хат, әв йәки хвәйиқәдър у әндәме шь-вина гьрәгыра бу. Әв хвәха жи ль һивийа П'адшатийа Хвәде бу. Ви төрөш кър, чу щәм Пилато, шьнйазе Иса же хвәст. <sup>44</sup>Пилато бһист кӧ Иса иди мьрийә, ә'щәб-майи ма. Гази сәрсәд<sup>ф</sup> кър у же пьрси: «Р'аст ә кӧ Әв өса зу мьрийә?» <sup>45</sup>Гава әв жь сәрсәд ә'сәйи пе һ'әсийа, шьнйаз да Усьв. <sup>46</sup>Ви қәдәке к'ътани к'ьр'и, шьнйаз ани хваре, пе к'әфән<sup>ф</sup> кър, т'ьр-бәкеда дани, йа кӧ қәйеда к'олайи бу. Кәвьрәк хол кьрә бәр дәре т'ьрбе. <sup>47</sup>Мәрийәма Мәждәлани у Мәрийәма дийа Йусес дитьн кӧ әв ль к'ӧ дәре хатә дәфьнкьрне.

**Иса жь мьрне р'адьбә**

(*Матта 28:1-8; Лука 24:1-12;*

*Йух'әнна 20:1-10)*

**16** <sup>1</sup>Пәй р'ожа шәмийер'а Мәрийәма Мәждәлани, Мәрийәма дийа Ақуб у Сәлома чун бһарәт<sup>ф</sup> к'ьр'ин, вәки

һәр'ьн ль шьнйазе Иса дьн. <sup>2</sup>Р'ожа һ'әфтийейә пешьн сәре сьбәһе зу, вәхте р'о дәрк'әт, әв чунә сәр т'ьрбе. <sup>3</sup>Вана р'ева һәвр'а дьгот: «К'и we бона мә кәвьр жь бәр дәре т'ьрбе хол кә?» <sup>4</sup>Чьмки кәвьр гәләки мәзьн бу. У гава кӧ ль жоре ньһер'ин, дина хвә дане, кӧ кәвьр жь бәр хол кьри йә. <sup>5</sup>У чахе чунә һьндөр'е т'ьрбе, дина хвә дане, хортәки чӧхе сьпи вәргьрти we ль алийе р'асте р'унышти йә. К'ӧлфәт гәләк зәндәгьрти ман. <sup>6</sup>Ле әви ванр'а гот: «Зәндәгьрти нәминьн! Хун ль ви Исайе Ньсрәте дьгәр'ьн, Йе кӧ хатә хачкьрне. Әв жь мьрне р'абуйә! Әв нә ль вьр ә. Ва йә әв щийе кӧ Әв ле данибу. <sup>7</sup>Дә ньһа һәр'ьн бежьнә шагьртед Ви у Пәтрус, кӧ Әве бәри вә һәр'ә Щәлиле. Ль вьр һуне Ви бьбиньн, чава кӧ Әви вәр'а готийә». <sup>8</sup>Әв к'ӧлфәт жь т'ьрбе дәрк'әтьн р'әвин, чьмки р'ьсәсе әв гьртьбун у дьләрьзин. Кәсир'а жи тыштәк нәготьн, чьмки сәве ль ван гьртьбу.

\* <sup>16:9</sup> Нав һьнәк дәстньвисар у вәлгәр'андьнед кәвьнда жь р'еза 9-а һ'әта йа 20-и т'ӧнәйә.

**Иса Хвә нишани**  
**Мәрийәма Мәждәлани дькә**

*(Мәтта 28:9-10;  
Йуһ'әнна 20:11-18)*

<sup>9</sup> Гава Иса р'ожа һ'әфтийейә пешьн сьбәһе зу жь мьрьне р'абу, **Ви** пешийе Хвә нишани Мәрийәма Мәждәлани кьр, йа кә һ'әфт шьн же дәрхьстьбу\*. <sup>10</sup> Әве жи чу әв йәк гиһандә әвед кә т'әви Иса гәр'ийабун, кә шин дькьрн у дьгьрийан. <sup>11</sup> Ле гава вана бьһист кә Иса сах ә у Хвә нишани Мәрийәме кьрийә, бавәр нәкьрн.

**Иса Хвә нишани**  
**дә шагьртед Хвә дькә**

*(Луқа 24:13-35)*

<sup>12</sup> Пәй ван йәкар'а Әви Хвә дьлқәки дьнда нишани жь ван дәда кьр, йед кә дьчунә к'әвшен. <sup>13</sup> Әвана жи чун әв хәбәр гиһандьнә йед майин. Ле готьна ван жи бавәр нәкьрн.

**Иса Хвә нишани**  
**йанздәһ шагьрта дькә**  
*(Мәтта 28:16-20; Луқа 24:36-49;  
Йуһ'әнна 20:19-23;  
К'аред Шандийа 1:6-8)*

<sup>14</sup> Пәй ве йәкер'а Иса Хвә нишани йанздәһа кьр, гава

әв ль сәр сьфре р'уньшьт-бун. Әви ль ван һьлат бо-на нәбавәри у сәрһ'ышкия ван, чьмки вана йед кә Әв жь мьрьне р'абуйи дитьбун бавәр нәкьрн. <sup>15</sup> У ванр'а гот: «Һәр'ьнә һәр чар алийед дьнйайе у Мьзгинийе бьдьнә һәр мәрьви. <sup>16</sup> Әве кә бавәр бькә у бе ньхөмандьне ве хь-лаз бә, ле әве кә бавәр нәкә диwana ви ве бьбә. <sup>17</sup> Әве кә бавәр дькьн, әв нишане ван-р'а дийар бьн: Бь наве Мьн ве шьна дәрхьн, бь зьманед ну ве хәбәр дьн, <sup>18</sup> ве мә'ра бь дәсте хвә бьгьрн у һәгәр әв тыштәки жә'р жи вәхьн, т'ө зьраре ль ван нәбә. Әве дәстед хвә дайньнә сәр нә-хвәша у нәхвәше қәнщ бьн».

**Жорһьлатьна Иса**

*(Луқа 24:50-53;  
К'аред Шандийа 1:9-11)*

<sup>19</sup> Ава Хөдан Иса пәй ве хәбәрдана т'әви ванр'а һьлк'ь-шийа ә'змен у ль мьле Хвәдейи р'асте р'уньшт. <sup>20</sup> Шагьрт жи чун, ль һәр щийи даннасин кьрн. Хөдан пыштоване ван бу у бь ван нишана хәбәра Хвә дьда избаткьрьне, к'ижанед кә бь дәсте ван дьбун.